

ርኢሰ ኢሳይያስ፡ አስክ ርኢሰ ቱርክያ ልእከት አሰናይ ነድእ

ርኢሰ ኢሳይያስ አፍወርቂ፡ እብ መናሰበት ዝክረት መትኣሳስ ጅምሁርየት ትርኪ፡ አስክ ርኢሰ ረጅብ ጠይብ ኤርዶጋን ልእከት አሰናይ ነድእ።

ርኢሰ ኢሳይያስ ዲብ ልእከቲ፡ ታሪካይ አሳስ ለበ ምስንዮት ኤረትርየ ወትርክ

ወሽዐበን፡ እትለ መጽእ ሰናታት እብ ለሒሰት ክም ትትጠወር ወትተረድ ለበተ ደማን ሸርሐ።

ዲብ ደንጎበ ርኢሰ ኢሳይያስ፡ እግል ርኢሰ ኤርዶጋን ዓፍየት ታመት፡ እግል ሸዑብ ጅምሁርየት ትርክ ህይ ዐውቲ ወሰላም ተምነ።



ሓክም ግ/በ/ቀየሕ፡ ምስል ወካይል ሸዑብ ግብለት ደንካልየ ለአምሐብር

ሓክም አቅሊም ግብለት በሐር ቀየሕ ሰፊር መሐመድሰዒድ መንታይ፡ ምስል ወካይል ሸዑብ ግብለት ደንካል ዲብ መትነፊፊ ወመትመዳድ ከደማት እጅትማዕየት ሀድገ።

እት 28 ወ29 አክቶበር ዲብ አቦ ወአላል ዲብ ገብአ እጅትመዓት፡ ሰፊር መሐመድሰዒድ መንታይ አሳሳይ ከደማት እጅትማዕየት እንዴ ትዳለ መናበረት ሸዑብ እግል አስነዮት ምን አውለውያት በራምጅ ዐማር ክምቲ እት ለሐብር፡ ሸዑብ ለትሸቀ እሉ መአሰሳት እብ ዋጅብ እግል ልትነፊፊ እብ ወመሓግዙ እግል ለአትምም ትፋነ።

“ዲብ ተዕሊም ለገብእ እስትሰማር፡ አሳስ ክሉ ተጠውር ወዐማር ሰበት ገብአቲ” ለበላ ሰፊር መሐመድሰዒድ መንታይ፡ ዋልዴን ፅምሩ ሰነት ድራሰት ለበጽሐ ጅነ አስክ ዐግሎ ተዕሊም እግል ልንደኦ ወለአትናይቶ አተንበሀ።

ዲብ ሐልፈ ሰኒን ለትሰርገል በራምጅ ፍገሪት እግል ትትረከብ ምኑ ለቀድረት፡ ሸዑብ እብ ተማሙ ሰበት ሻረክ እቲ ክምስልቲ እንዴ ሸርሐ ህይ፡ ዲብ እሊ ወክድ ጎነ እንቡት ለህለ ክምኩም በራምጅ ዐማር ግንራራብ፡ ዲብ አስነዮት መናበረት ሸዑብ ዶር ዐቢ ሰበት ቡ፡ ሸዑብ መሻረከቲ እግል ለአደቅብ ትላከ።

ሰፊር መሐመድሰዒድ መንታይ ዲብ ደንጎብ፡ ሸዑብ ሚልካይ ናይል ዲብ ድዋራቲ ለትሸቀ መአሰሳት ከደማት እጅትማዕየት ሰበት ቲ፡ አተላላይ ለበ ክድመት እግል ለአድምን፡ ለለአስትህል መርዒት እግል ሊዴ እሉ ክምስል ወጅብ አትፋቀደ።

መስኡሊን አፍሪዐት ውዛረት ተዕሊም፡ ዓፍየት ወርዝቅ በሐር እብ ጀሀቶም፡ እግል መትነፊፊ ሸዑብ እብ መጃል መጃሉ ተውዴሕ ሀበው።

ምሻርክት እብ ጀሀቶም፡ ዲብ መሻፊፊ ወጀዶት ማይ ለትሳድፍ ክራብ ሻፍግ አትሳናይ እግል ሊደው እሉ ዲብ ልትሐሰቡ፡ ምኖም ለልጠላብ እግል ለአትምሞ ዱሉያም ክምቶም አከደው።

ዲብ ፎሮ ወሽዑብ፡ ዝላም መደረት ተአጀፊ

ዲብ ምዴርየት ፎሮ፡ ዲብ ዮም 28 ወ29 አክቶበር እበ ዘለመት ዝላም፡ ክልኦት ምዋጥን መይቶ ዲብ ህለው፡ ዲብ ብንዩት ትሕትየት ሐርስ መደረት ጀሬት።

እብ አሳስ ምን እዳረት ምዴርየት ፎሮ ለትረከበት ሐብሬ፡ ዲብ ዮም 28 አክቶበር ዲብ ባኮት ሐደት ሐቲ ወለት 16 ሰነት ሻበት እብ ቃቀት ትመይት ዲብ ህሌት፡ ዲብ ዮም 29 አክቶበር ህይ 55 ሰነት ለፅምረ እሲት ውሒዝ ክም ገለየ ተአመረ።

እሊ ክእነ ዲብ እንቲ፡ ዲብ ባኮት ዙሉ፡ አፍተ ወሐዲሽ እብ ማሸኔሪ ለትሸቀ ዐግም ክምስል ሀግ ወኪል ኤሪና ምነ ምዴርየት ሐበረ።እምበል እሊመ፡ ዲብ ምዴርየት ቅርረ እብ ቃቀት ዎሮ ምዋጥን መይት ዲብ ህሌ፡ ሰለስ

ብዕዳም ህይ ዲብ ገርቦም መደረት ክም ጀሬት ምነ አካን ለበጽሐተነ ሐብሬ አትአመረት።

እሊ ክእነ ዲብ እንቲ፡ ዲብ ምዴርየት ሸዑብ እግል ዝያድ ሰለስ ሳዐት ለዘልመት 88 ሚሊሜተር ለቅያስ ዝላም፡ ዲብ ብንዩት ትሕትየት ሐርስ፡ አብያት ወክጡዋ መዋሰላት መደረት ዐባይ አጅሬት።

እብ አሳስ ሐብሬ መመቅረሓይ እዳረት ደዋዬሕ መንሸብ አሰይድ መሐመድ ሕሴን፡ ምን አድብር ለትከረ ወሓይዝ፡ መሓዛት ማይ-ኡሌ፡ ሳብ፡ ገርሲሌ ወግርግር ምን ቅያስ ወለዐል ሰበት ትመለኦ፡ እት ዐግምት ክምስል ፈርስ ልትአመር።

እምበል እሊመ፡ እበ ሳደፈ ድቁብ ውሒዝ፡ ዲብ ቅብለት ወግብለት መንሸብ ተርቅ ሳድፍ እት ህሌ፡ ዲብ ጽርግዩ ሸዑብ አፍዐበት ህይ ሸበህ መደረት ጀሬት።

ቅ/በ/ቀየሕ፡ ሄራር ዐማር ለትከሰስ ዝያረት ሓክመት አቅሊም

እት አቅሊም ቅብለት በሐር ቀየሕ፡ ሰነን ለትፈናተየ ምዴርያት፡ እብ ደረጀት ማዕየ ልሰርገል ለህለ በራምጅ ዐማር እግል ልትዐወት መዳላዮም እንዴ አከደው፡ ምን መቅደረቶም ወለዐል ላቲ ሰዳይት ሕኩመት እግል ትግባእ እግሎም አትፋቀደው።

ወካይል ሸዑብ ምዴርያት አፍዐበት፡ ነቅፊ፡ አዶብሐ፡ ወቅሮረ፡ እሊ ለሸርሐው፡ ምስል ሓክመት አቅሊም አሰይደ አስመረት አብርሀ እተ ወደው ህድግ ቲ።

ህቶም ዲብ ረአዮም፡ መሐገዝ ማይ ሲቶ ወክሀረበት ሐል እግል ልትባሰር እግሉ፡ ዲብ ክቡድ ላቲ አሸቃል ጽርግያታት ወሕፍዘት ማይ ወትርበት ሰዳይት ማሸነሪ

እግል ትግባእ እግሎም፡ እንቡት ለህለ በራምጅ አደላዮት እትሳላት ወመትመዳዱ እግል ልፍየሕ፡ እተክምስልሁመ ዐመሲ ለጸንሐ እቲ መራክዝ እበ ትደረሰት ገበይ እግል ልትብኔ ትፋነው።

አሰይደ አስመረት፡ ዓም ቴለል ከደማት እጅትማዕየት፡ እተይ ሐርስ ወንዋይ እግል ልዕቤ ገብእ ለህለ ወራታት ሕፍዘት ማይ ወትርበት፡ እተክምስልሁመ ብንዩት ወአስነዮት አግቡይ ሐቆ ገንሐት ምስል ወካይል ሸዑብ ህድገት።

እተ ምን ዮም 19 አስክ 29 አክቶበር ለወዴተ ዝያረት፡ አሰይደ አስመረት፡ ከደማት ማይ ኦዳም ወንዋይ እግል ልትአከድ እብ

መሻረክት እዳረት አቅሊም፡ ሸዑብ፡ ቅዋት ድፋዕ ወመአሰስት ዐዲ ሃሎ ልትሸቁ ለህለ ከዛናት ወአሸራም፡ ሄራር አግቡይ ረድምየት፡ አክረት፡ አሸረዐት፡ ውሓለት ሕዛዕ ደገጊት፡ መዳርስ ንቃዋ ማይ ወዐወሊ፡ እተክምስልሁመ ከደማት ሞባይል እግል ልትመደድ ልሰርገል ለህለ ወራታት ገንሐት ወምስል ክሰሰን ጅሃት ናቀሸት እቲ።

እምበል እሊ፡ ምስል ዐባዩ ዐድ፡ ልጃን ደገጊት፡ መስኡሊን እዳራት ደዋይሕ፡ሸቃለ ሕኩመት ውበዕዳም ጅሃት ዲብ ወዴቲ ህድግ፡ ዲብ በራምጅ ዐማር ወመሻረክት ሸዑብ ወዴሽ ወፍገራቲ፡ መትክምካም ደገጊት ወመንፈዐቲ፡ ወዲብ ተሌ ወክድ ለልሰርገል በራምጅ ዐማር ወአግቡይ ጸብጠቲ ህድገት።

ምግብ፡ እግል ደረሰ ፈዳብያም መትናየቲ ልትህየብ

ዲብ አቅሊም ምግብ፡ መዳርስ ካልኣይት ወምግባይት ደረጀት ፡ ዲብ እምትሓን ሸሃደት ሰነት ድራሰት 2022/2023 ንቃዋ ውቁል እግል አምጽአው ደረሳህን አትናየተዩ።

መድረሰት ካልኣይት ደረጀት እምበሀረ ዮም 29 አክቶበር ዲብ ወዴተ ዓደት፡ ንቃዋ ውቁል እግል ሰጆለው 41 አንፋር 35ይት ደውረት ክድመት ወጠን ደረሳህ ጀዋእዝ ሀበት።

ሙዲርላ መድረሰት አሰይድ ብርሃኔ አንዩ እተ አስምዐየ ከሊመት፡ እብ ደረጀትለ መድረሰት ናይ ሰልፍ ላቲ እግል ጀዋእዝ ለነሰአው ዝያድ ፍገሪት እግል ለአምጽኦ እግል ልክደዋ

መስኡልየት ለለአረፍዕ፡ ወእግለ ግራሆም ለህለው አሰርም እግል ልጽበጦ ገጽ ቀደም ለሰንድ ክምቲ ሐበረ።

መስኡል መክተብ ተዐሊም ቅብለት ምፍጋር ጽሓይ አስመረ መምህር ግርማይ ዐንዱ እብ ጀሀቲ፡ ለዮም ዓመት ርክበት ለህሌት ፍገሪት፡ እግል ዝያድ ካድም ለተአትናይት ክምተ እንዴ ሐበረ፡ ደረሰ እብለ ፍገሪት እለ እንዴ ኢልትፈግዮ፡ እግል ዝያድ ዐውቲ እግል ልሸቀው ትፋነ።

ሕድ እበ ሸብህ፡ ዲብ ምዴርየት ጸጸራት ወጎዳይፍ ለህለየ መዳርስ ምግባይት ደረጀት ሓድነት ወ24 ማዩ፡

ዲብ እምትሓን ሸሃደት 8ይ ፈሰል ንቃዋ ውቁል እግል አምጽአው ደረሳህን ጀዋእዝ ሀበዩ።

ሙዲር መድረሰት ሓድነት መምህር ዳኒኤል ሃብቲ እተ አስምዐየ ከሊመት፡ ዲብ እምትሓን 8ይ ፈሰል ምነ ሻረከው 680 ደረሰ ለ76.4 ምእታይት ክም ሐልፈው፡ ምኖም ለ33 ምን 85 ምእታይት ወለዐል ክመምጽአው ሐበረ።

መድረሰት ምግባይት ደረጀት 24 ማዮ ዲብ ወዴተ ዓደትመ፡ ምን 271 ደረሰ ለ92.3 ምእታይት ክምሐልፈው፡ ምኖም ህይ 35 ጃኢዘት እግል ልንስኦ ክም ቀድረው ሙዲርላ መድረሰት መምህር አንጎሶም አለም ሸርሐ።

እብ ሰዓይት ሐካይም ኢጣልያ፡ እት ሐሊበት ዐመልያት ዓጭሞታት እግል አጀኒት ገብእ

እት እስብዓልያት ሐሊበት፡ እብ መዓወነት ምን ኢጣልያ ለመጽአው ሐሽም ሐካይም ‘ኣኩልያሞ’ ላ ዲስታንዝ፡ ምን ዮም 25 ኣሰክ 28 ኣክብር እግል አጀኒት ዐመልያት ኣርትዮት ዓጭሞታት እደይ ወእገር ገብኦ።

እብ እስብዓልያት መስኡል ቅስም ዐመልያት ዓጭሞታት ወዐንጽብ ዶ/ር ሰለሙን ጸጋይ፡ ኣንፋር መጀመሪያት ሐካይም ‘ኣኩልያሞ’ ላ ዲስታንዝ፡ ምን ቀደም ዐስር ሰነት እንዴ ኣንበተው ዲብ ክል ሰሰ ወሬሕ እት መጽኢ ዐመልያት ዓጭሞታት ወዱ ክም ጸንሐው ወህለው እት ሸሬሕ፡ እትሲ ዐመልያት ኣዜ፡ ምን 15 ሰነት ዓማር ወተሐት እግል ህለው 16 ጅነ ዐመልያት ክም ወደው ሐበረ።

ህቱ እንዴ ኣትሉ፡ ቀደም ሲዕ ሰነት ዲብ እስብዓልያት እግል ናይ ዓጭም ወዐንጽብ ዐመልያት ለገብእ 10 ቁርፈት፡ እብሊ ሐሽም ሐካይም ክም ትሸቀየ ኣብርሀ።

ኣንፋር ሐሽም ሐካይም ‘ኣኩልያሞ’ ላ ዲስታንዝ፡ እብ ጀህቶም እብ ዲብ ኤረትርየ ለጽንሐ እትን ኣምዒላት ሕዱዳት፡ እምበለ ወደው ዐመልያት፡ ዲብ ዓጭሞታት ፍለክ ለሳድፍ ኢመትሳዋይ ዲብ ወክድ ዕምሰነ እንዴ ኣሌሌክ እምበል ዐመልያት እግል ልርተዕ ለለኣተቅድር ኣብሳር እግል ኣንፋር ውላደት እስብዓልያት ኣርተ ተኣሂል ለህይዮ ክም ህለው ሸርሐው።

ሐሽም ሐካይም ‘ኣኩልያሞ’ ላ ዲስታንዝ፡ እት ሰነት 2009 ቱ ለትኣሰሰ።



ኤረትርየ፡ እት 16ይ ወዕለ መኤምረት መትሳዳይ ቻይና ወአፍሪቀ ትሻርክ



እብ ሰፊር ነጋሲ ሰንጋል- እት ውዛረት ካርጅየት ሙዲር ዓም ቅስም ብሐሰ ወሐብሬ ለትመረሐ ልኡክ ኤረትርየ፡ እት ዮም 23 ወ24 ኣክብር እት በይጂን ጅምሁርየት ቻይና እት ገእ 16ይ ወዕለ መኤምረት መትሳዳይ ቻይና ወአፍሪቀ ሻርክት።

ለወዕሉ፡ እት ኖቬምበር 2021 እት ዓካር እት ገብእ 8ይ እጅትመዕ ውዛረእ ካርጅየት መትሳዳይ ቻይና ወአፍሪቀ፡ ሕክመት ቻይና ምን ሰነት 2022-2024 እት ፈዓልየት መሻፊዕ

ዐማር ዐባዩ እግል ልውዕል፡ እብ ሰዓይት ርቤሕ ብዙሕ ለኣለበ ሰልፈት እግል ድወል አፍሪቀ ለየመመተ 60 ቢልዮን ዶላር ኣሚሪኬ፡ ክምሰልሁመ ሄራረ ለክሰስ ኣሸቃል ጌመመ።

እምበል እሊመ፡ ወዕለ ሚርሐት ሰዓይት ቻይና ወአፍሪቀ ሰነት 2024 እት በይጂን እግል ልግበእ ክም ትቀረረ፡ እት ገብእ መዓሊት ተህደገ።

ወዕለ መኤምረት መትሳዳይ ቻይና ወአፍሪቀ እት ደንጎቤ እት ትቀደመ ወሳይቅ እብ ፋይሕ ክም ተህደገ፡ ስታት 16ይ ወዕለ መትሳዳይ ቻይና ወአፍሪቀ እቱ ሳደቀ።

እብ መናሰበት፡ ወካይል ዐባዩ መኣሰሳት ማል ቻይና፡ እግል ሰርገለ ወራታት ምስል አፍሪቀ ወድያሁ ለህለየ መትሳዳይ እብ ክሰስ ሸሬሕ ቀደመየ።

እትሲ ወካይል 53 ዱለት አፍሪቀ ለሻርክየ እቱ ወዕሉ፡ ኣሰይድ እዮብ ተኽሌ ምን ሰፋረት ደውለት ኤረትርየ እት ጅምሁርየት ቻይና’መ ሹሩክ ዐለ።

ገዲም ምናድል ብርጋደር ጀነራል ዓንኤል ኣብረሃ (ጨዓይ) ኣስተሽህደ

ምናድል ገዲም - ብርጋደር ጀነራል ዓንኤል ኣብረሃ ሙብራህቱ (ጨዓይ)፡ እት ዮም 27 ኣክብር ዲብ 71 ሰነት ዕምሩ እብ ሕማም ኣስተሽህደ።

እት ሰነት 1971 ዲብ ቅዋት ሸዕብየ ተሕሪር ኤረትርየ ለፈግረ ምናድል ዓንኤል፡ ዲብ መደት ንዓል ሕርየት እት ለትፈናተየ ውሕዳት እንዴ ትወዘዕ፡ ኣሰክ እብ መስኡልየት ቃእድ ክፈል ዲሽ፡ ሐቀ ሕርየት ህዩ ዲብ መክተብ እዓረት ውዛረት ድፋዕ እንዴ ትየመመ፡ ሸዕቡ ወወጠኑ እብ መትሰሳል ለከድመ ምሕርባይ ቱ።

ሸሂድ ብርጋደር ጀነራል ዓንኤል ኣብርረሃ፡ በዕል ፈረዕ ወኣብ ሰለስ ኣጀኒት ቱ።

ዓደት ቀብሩ ህዩ፡ እት ዮም 28 ኣክብር ኣደሐ ዲብ መቅበረት ሹህደእ ኣስመረ፡ ርኢስ ኢሲያስ አፍወርቂ፡ ውዛረእ ለብኡቶም ውቁላም ሰብ ሰልጠት ሕክመት ወጀብህት ሸዕብየት።

ቅዳዳት ዲሽ ወኣብ ኣላፍ ለልትዐለብ ሸዕቡ ፈተቹ ወመልህም ንዓሉ እት ሐድረው ዲብ ኢነት፡ እብ ሕሽመት ተ’መት።

ዓም መክተብ እዓረት ውዛረት ድፋዕ፡ እብ እስትሸሃድ ገዲም ምናድል ብርጋደር ጀነራል ዓንኤል ኣብርሃ ለትሰምዐዩ ሐዘን እት ሸሬሕ፡ እግል ጸዋሁ፡ ፈተቹ ወመልህም ንዓሉ፡ “ኤማን ወሰብር ለህበኩም” ልብል።



ሐብሬ ምን ውዛረት ሐርስ

ዮም ዓመት፡ ለእት ቀበት ሰቦ ሰነት ክልኤ ዶል ለልትርኤ ‘ኤል-ኒኖ-EL-NINO’ እብ ለትትኣመር ለኢትሳዌት ኣለት ጀው ሱዱፍ ሰበት ህሉ፡ ዲብ ክእነ ለመስል ቴለል ጀው፡ ዝላም ኣውል ሰበት ትቀዝር፡ ዲብ ረክበ ኣቃሊም ዐድነ ተኣሲር ትወዴ።

እብሊ ሰብ ክ’መ እንብትተ ለህሌት፡ ዲብ ኣውለት ወቀላቅሎታት ምውዳቅ ጸሓይ ዝላም እግል ተኣተላሊ ሰበት ትቀድር፡ ክሎም ሐረሰቶት ለበሽለ ኣካሎም ኣገድ እግል ለኣቱ ተኣተንብህ።

ውዛረት ሐርስ - 26 ኣክብር 2023

ጸረትርየዐጸዳሽ

ክል ኣርቡዕ ለትጠ’በዕ ጀሪደት

መዓልያይ፡-
- መሐመድ እድሪስ

ለይኣውት ወኣርተየት
* ዘህረ ዐሊ
* ፋዋን ኣድም

ተለፎን፡ 121797/07121322
ፋክስ፡127749፡ ዕ.ሰ.ቡ፡ 247

ተውዝዕ ጀሪደት፡
ተለፎን፡ 200454

ኣትኣመሮት፡
ተለፎን፡ 125013፡ ዕ.ሰ.ቡ፡ 1284

7^ይ ክፈል

ሳብሪን ፍንጌ እለ ወሌሀ ጎማተ እት ሚ ክምሰል ትወድቅ ትቀዌት እተ። እተ ለእግል ሰኒን ትምኔተ ምግያስ አስክ ካርጅ እተ እግል ኢትትደለል እት ባለ ለኢዐለ ሻም ፍንጌህ ወፍንጌ ናስር ትከለቀ። እት ሻም ናስር እግል ኢትተንክብ እግል ሐወ አላፍ ሰላዲ አክሰረቶም ለዐለት ጸንዐ እተ፡ “እነ ወዐለዮ” እት ትብሎም። እት ደንጎበ እግል ሻም ናስር ወሰፈላል ዋልዴነ ድገለበ እንዴ ሸንኬቶም፡ እተ ናይ ዲመ ትምኔተ ለዐለ ቀራር ሳብት ግያስ አስክ ካርጅ እቱ ዋፈቀት። ሰፈር አስክ ከነደ። ምእት ምን ምእት ሕሳባተ አስክ ሰፈር ካርጅ ደለቱ።

እመ ወኡባህ “እግልነ እንዴ ሐደግኪኑ ነብረ ዐለዮ ሐሬኪ ሳብሪን”? እት ልቡለ ግራህ እንዴ ሀቡቶም እስእነ አስክ ዐለዮ ዋጪለት ሳብሪን። የቲም ሻመ ናስርመ እግለ ረቢ ከትብዩ ሰብር ደቅቡ። ቀደም አምዕል ሰፈረ እብ ሐቲ አምዕል እት ምግብለ ትፈትዮን ክልኤ መሳኒተ እንዴ ገብአት ንዕመ ወንዕማት እት ልትዛወረ፡ አመት አድሕድ እንዴ ኢወዱ እት ኣካን ጭንቢት ትራክበው። ሳብሪን እለ አምዕል እለ ላቱ ምን ሚ ልብሉክ እንዴ ኢትትሃረብ ወምነ ምስለ ለዐለዩ መሳኒተ፡ ለእብ ሻመ ወሻም ናስር ቀነአ ለዐለዩ እንዴ ኢትከጅል፡ ክምሰል ንኡሻይ አቡሁ ልትከበት እት ወራዱ ሰረት እግሉ። ናስርመ እንዴ ኢናፍገ ክምሰል ወሀበት ራክብ ሐኮካ እቡ። እብ ደሚሮም ህዩ ሸንርብ ፍንቲት ምን እሳት ክምሰል ትሐፍን ቀበለት ፈቅደው። እግለ እት ሞባይለ ትኣትሐልዩ ለዐለት እብ ሰልጣን ዐሊ ለትትሐሌ ‘አልዐሴረት አምዕል ሰፈርኪ’ እለ አስመዐቱ ክምሰል ናይ ደንጎበ መርኢቶም ወእብ እትሰላመት ወደሐን ንትርኤ፡ ምን መሸንገል አድሕድ ትፈናተው።

ለሀ ሰነት ምስል ናስር እት ጸሊም ሰጅል ትሰጀለት ከሐልፈት። ሐቆ ገሌ አውረሐት ምን ሰፈር ሳብሪን አስክ ሱዳን ወቀደም ፈገረ ምን ደውለት ሱዳን ዛህረት ሕማም ኮሮን ሰበት ዘሀረት፡ ሳብሪን በክት ሰፈር እንዴ ኢትረክብ እት ሱዳን ትወሸቀት። ናስር ምን ሸቅሉ ወሻሙ እንዴ ትፈንተ እተ እቱ ትወለደ ብሩር ዐዱ አቅበሉ። እብሊ አሰባብ እሊ (ሰነት ጭንብው) እንዴ ቤለ ሰመዩ ለሰነት ለሀ። ለፍግረተ ወእትየተ ልርኤ ምኑ ለዐለ ድካን ሐቆ ሰፈር ሳብሪን ነፍሱ ኢረዴቱ እግሉ። እብሊ አሰባብ እሊ እብ ፊቃዶ ሻም ሳብሪን ደሚሩ እግል ኢልትናከእ ሰበት ሐዘ፡ ሐቆህ ገዘዘ ምነ ለመዲነት ለምስል ሳብሪን ተአመረ እተ። እብሊ ህዩ ሰጅል ሻም ሳብሪን እብ ዋጅብ እንዴ ጤመዩ እት መስከብ ሕሸመት ቱ ለቤለዩ እቱ ተኣከቡ። እግል ካልእ ሸቅል ልከዜ ምስል ምርት ፈታዩ ወናይ ክል ዶል መሰኒሁ ላቱ ተሐት ወለዐል እት ልብሎ ትረአው።

እሊ እተ ረአየተ ክልኤ ለዕንቶም ለዐላቱ እንዴ ኢኮን እት ቀይቡበት ለመጽእ ወቅት ለዐለ፡ እምብል ረቢ ቁልዑ ለዐለ አለቡ። ናስር እግለ

ሻም ሕዋኬ

ምስል ሳብሪን ተአመረ እተ መዲነት፡ ወለ እተ ትወለደ ዐዱ፡ እንዴ አዝመ ምነን ምስለ መለሀዩ ወፈታዩ ላቱ ጣህር እት ብዕደት መዲነት እግል ልንበር አሰተብደ። ናስር ወጣህር ምስል እት ለአረይሞ ወለአቀርቦ ወእት ወድቆ ወቀንጾ እግል ሸቅል ልርከቦ ልትመወጅ ሐቆለ ጸንሐው፡ እት ሳየርት ሐያት ለሰድዮም ሸቅል እግል ልርከቦ ቀድረው። ጣህር እግል ልህዴ ወመስተቅበል ሐያቱ ልብኔ ለሐዜ ሰበት ዐለ፡ እበ ምን ሸቅሉ ለረክበዩን ሰላዲ እት ታምም መዳሊት ህዳዩ በጽሐ። ፈገይር ህዳይ ጣህር ምን ወሬሕ እት ዕዱዳት አምዴላት ክማም ገብእ።

ናስርመ “ያሬት አናመ እት ክምሰል እሊ መዳሊት መለሀዩ ጣህር ባጽሕ ወገብእነ” እት ልብል ክምሰል ፍቱይ ወአሚን ወገልገላይ ወመሰኒ እግል ህዳይ መለሀዩ ጣህር ተሐት ወለዐል ትረገሰ።



ፈጋይር ምን አርቦዕ እት ከሚስ ወጅምዐት ተዐደ። እዴ ማን ወእመን መሰኒ እግል ጣህር ኖሱ ናስር ሰበት ዐለ፡ እት ቤት ለዐለት ወምን ሱግ ለትመጽእ ክለ እት ሐንቲ ካፈት ወመስኡልየት ናስር መለሀዩ ዋድሀ ዐለ ጣህር። ምን ከርስ ቤት ለነቅሰት ምናም እብ ሕት ጣህር ዜነብ (በልቂስ) እት ወቅተ ወሳዐተ እግል ናስር እት ትሐብሩ ትረክበ ዐለት። ናስር እብ ሻፍግ እት እዴህን ክምሰል ትትከሬ ወድዩ እግለን ዐለ። ምን ሱግ ለትመጽእ ህዩ ኖሱ ናስር ለአገድዩ እግለን ዐለ።

ናስር ወዜነብ (በልቂስ) እግል ሰልፍ ዶልቶም እት ህዳይ ጣህር ልትረአው ለህለው ወልትአመር። ክልኦት እሎም እት ክድመት ህዳይ ጣህር ለትአመረው፡ ፍንቲት ዕላቀት ምስንዮት ትከለቀት ፍንጌ ክልኢቶም። ክምሰል ክልኦት ሐው ውላድ እም ህዩ እለ ወሌሀ እት ልትባህሎ እግለ እቱ

ክስኣም ለዐለው ዳይ እበ ለትትዐጅብ አትፋገረው። ክሉ እተ ህዳይ ማጽእ ለዐለ ኢያይ ወጋሻይ እብ ወቀዮም ሐመደዮም። እብ ክእኒ ህዩ እት ዳግሞ ልትሰምዖ ዐለው መትሃግየት። “ዜነብ (በልቂስ) ወለ መሰኒሁ እብ በኖም አትፋገረው እሊ ህዳይ፡ ሓስድ እብን ትክመህ ምናም። ምርቶም እብ ዐድ ወምርቶም እብ ናይ ሱግ ብሞረት ሐቲ እናስ እንዴ በሞረው አትፋገረው። ወለት እም ለልቡለ እላተ። ወምሰኒመ ክምሰልሁ ወዴ” እት ልብሎ ሐምዴሆም እት ሸረሐ ልትሰምዖ ዐለው።

በልቂስ ምን ሰልፍ ረአየት ልበ እብ ፈተ ናስር ሰካብ ላሊ ትጋረፈ እተ። እብ ሚ ልብሉክ አንሳይት ህዩ እት ተኣዝም የም ዳየ ጋብኦት ምኑ ዐለት። ሻም ቱ ሚ ቀደር? ሐቲሁ እንዴ ኢትፈርግ እት ሰርሐ ህዳይ ሐህ ኬን ወእንሰር ትረገሰት። ኣክለ አርወሐተ እግል ረአየት ወህጅክ ናስር

ለኢረክብ ምኑ ሰኣል እቡ ሐንገሉ ረብሸ ዐለ። ውላደ እግል ኢልበሎም ክሉ ክሉ ዋልደቶም ኢትመሰል። ህታመ ኢኮን እግል ኢልበል “ይመ” እት ልብሎ ሰምዖም ዐለ። ሕትዩት “ይመ” ቃልበቱ እት እንተ ቅሩብ እንዴ ኢልትሰኣል ምነ ወልቡ እንዴ ኢረድዩ እግል ወቅት አዝመ ምኑ።

ኣክለ አምዕል አጽበሐተ ወአምሴተ በልቂሱ ዝያድ ልበ አስክ ናስር አሻከተዩ። እግል ተኣትዐግቡመ ምንዴ ሐዜት ምን ስመዕ ወበሊስ ባባቱ እንዴ ዳብኦ አሰሩ ክምሰል ትሸክት ወደዩ። አዳም ለኢትጸበረዩ ሸዑር ሻማት ትከለቀ ፍንጌ ክልኢቶም። እብ ፍንቲይ እብ እትጅህ በልቂሰም። ምን ናስር ለጠልቡ ጠለባት ህዳይ ሐሁ ጣህር ወለዐል፡ ልበ እብ ሻማት ናስር ሰበት ቀፍለ ምነ ክል ደጊገት ወሳንዩት እግል ልክያሁ ወሞውያሁ እንዴ ተዐንደቀት “ናስር” እት ትብል እተ ህዳይ ማጽእ ለዐለ ወለ ዐለዩ ሀድገው እቦም።

ናስር ላኪን አስክ እለ ልቡ ምነ እቡ በሽል ለዐለ ሻማት ሳብሪን አስክለ ምስል ሕት ጣህር ልትዋጅህ እትንቱን እግሉ ሰበት ይዐለ፡ ካልእ ዶል ባባቱ እግል ሐዲስ ሻማት እግል ለአርሕዩ እት ሕሳቡ ማጽእ እግሉ ኢለአምር ወእት ከያሉ ውስወስ እግሉ ኢኮን። ህያብ ሻም ላኪን እንዴ ሐዜነሁ ለትረክቡ ወእንዴ አቤካህ ለትለክፉ ሰበት ኢኮን መዋዕዱ እንዴ ኢትደሌ ኖሱ ክማም ለገብእ እትክ ህያብ ጠቢዐት ቱ። እግለ እት ገጽ (በልቂስ) ለዐለ አሻይር ፍቲ ኣክለ ረኣተ እት ልትፈክር ባሉ ለሀይቡ ይዐለ። እብ ደሚሩ ህዩ፡ “ኮንዶእ ኣዜ እፈቱ ገብእ? ወእብ ፍቲ አዋልድ አትሀድግ፡ ኢመሰለኒ። ክሉ ክሉ እለ ጋብኦት ኢኮን ወኢትገብእ” እት ልብል ምን መሰለኒ ወኣትማሳል እብ አኪደት ክምሰል ኢፈቱ ምስል ርሐ ሾረቱ ባትክ እት እንቱ፡ እተ እግል ዐውቴህ ተሐት ወለዐል ልብል ለዐለ ህዳይ ጣህር መለሀዩ ልስዴ ዐለ።

በልቂስ ዴሪር ናስር ክምሰል ሓባል ዋናበት እት ክሉ ገርቦ ትለዋለ እግለ። ነፍሰ እምበል “ረአየት ናስር እንቲ ተርጀመት ኣለብኪ ወመዐነት” ቱለ። “እግሉ ረኣይ ወእግሉ ተምነይ ወምስሉ ቅነጺ ወትገሰይ” ለልብል አማዉር ሰበት ሀቡተ፡ እብ ጋረ ልግበእ ወእምበል ጋር አፋህ ናስር ኢከሬ ወዕንተ ምን ረአየቱ ኢተዓርፍ ገብኦት፡ መስኪናይ ልብ ፋቲ። ልብ ፋቲ ወመዋዲቱ ሰኒ ለኣትፈክረከ። ክሉ ልብል ወህቱ በህል ርሐ ሌጠ ሰምዕ እንዴ ኢኮን ልቡ እግል ካልእ አመቱ ኢወዴ።

ዜነብ ውላድ ወአዋልድ ሕለተ እብ በልቂስ ለከነዋተ ምስል መልክት ሰብኦ (የምን) በልቅስ እንዴ አጸበጠው ቶም። እግል በልቅስ ቅሰተ ምስል (ሰደድነ ሰሌማን ዐለይሁ አሰላም) ክምሰል ቀረኣክ ለወሰፎም ለዐጅበክ እብ ስያስ ልግበእ ወግርመተ ወለባበት ዐቅሎ። በልቂስ እት ሸፍረ ወቀበት ቤተ፡ እብ መሐልክ ሻም ናስር እንዴ

ትሐለከት፡ እት ምግብ ዐድ ሓድር እብ ዕንቅራረ ወድቀት መስኪነት። ለስኩብ ወቅሱን ለዐለ ልብ በልቂስ ክትል ሻም ናስር ምን ገብእ ወሐር ክምሰል ገመል ሱቲይ አሲር ሻም ናስር ክምሰል ገብኦ፡ ብለዕ ኢኮን ወስታይ ሐኖናይ ሌጠ ትከፈላት ክምሰል ወኣት ሐብሐብ። እምበል እግል ረአየት ወስመዕ ሰሜቱ አንጎጋይ፡ ካልእ የም ልበ ለትገብእ ሐቲ ይዐለት።

በልቂስ ኖሰ ለሐፊቱ ወዋልዴነ ለድሐረዉ እግለ ሰነተ ምስሉ እንዴ ትህዴት ወለት ወሕጻን ክምሰል ወልደው ወእብ ቅስመት ክምሰል ትፈናተው ምን መዳግም ቀዳሚት ቅሰተ ልትፈሀመነ። ወዴከኒ ወገበርከኒ ለኣለቡ ሕድጎ እቡ ትፈናተው። እበ ሕድገሆም ህተ ወብእስ ክል ኢያዮም እት ደንግጽ፡ እበ ምን አድሕድ ለትሳርሐዋተ ግርም ሰርሐ ህዩ ክሉ ሐመደዮም። እንዴ ደክለምመ እግል ኢልባሉሶም እለ ትገበኣነ ወእለ አንቀሰነ ምን ወለት ኢትሰመዐት ወምን ሕጻን። (“እብ ሰኔት ትናብር ወእብ ሰኔት ትፈናቱ”) ሰበት ልብል መምርሐ ሸርዐት “ሐቆ ኢትናበረው ግርም ሰርሓመ ግርም ተ” እት ልብሎ ልትሰምዖ ዐለው መደክለቶም ወአበምም።

በልቂስ ለሲያስ ወለ ግርመተ እት ትርኤ እግል ናስር ኢትረቅበ እቱ ወኢትቀብበ እግሉ። እብ ዓማሮም ምስል እት ተኣትመጣውሮም ላቱ ምን ናስር ክምሰል ትዐቤ ልትብዩን እግልከ። ህቱ በጽሕ ወሬዘ ወህተ መበል እም ክልኦት ተ ለዐለት። ናስርመ እት ሻሙ ትወድቅ እንዴ ቤለ ሓስበ ኢለአምር። የምክን ፈቲቱመ ምንዴ ገብእ እንዴ አቅረቡቱ ከክምሰል ሐህ ወድ እመ ሐትነቶም እት ኣሕድ እግል ትዚድ ትቀድር ትብል፡ ወለ ትሰረረተ ክሉ ክሉ ለኢገብእ ሸእ እት እንቱ ልትርኤከ። ክምሰለ ቀረኣናህ ላኪን ሻም መትጋምያይ ለኣለቡ ሸእ ሰበት ገብእ፡ ኖሱ ቱ ለእግለ አመመ ለአስክ ገይሰ። አልባቦም ሰከብ ወቅሱን እት እንቱ እንትብህ እት አድሕድ ለወደው።

ልብ ዜነብ ምስል ናስር ትረፍዐ ወትከረ። ቅንጾት ወግሳየት እንዴ አምረረት እቱ። እት ገጸ ክምሰል ምራየት እግል ትዕፈዩ ሰበት ሸንህት “ናስር” እት ትብል እግል ኢትፍገር ምነ አፍረህት።

በክት ህጅክ ወመትግሳይ እት ኢያም ህዳይ ኢረክበት እቱ። መርገውዮታት አምዕል ዐዘመቶም እት ለአምሀድኖ፡ በልቂስ እንዴ አትባቂት እት ቤት ዐደ ቡነ እንዴ አፍለሐት እግል ናስር እብ በኑ ምስለ ክምሰል ሰቱ ትጻገመት። ናስር ምስለ ወምስለ ክልኦት ውላደ ለህቱ ሐወ ነኢዩሸ መሱሉ ለዐለው ቡን እግል ልሰቱ አሰተብደ። እለ ቡን እለ እግል መትአመሪ እንዴ ትቤ ለአፍለሐተ ቡን ተ ለዐለት። ለውላደ ኣክለ “ይመ” ቤለዋተ አርወሐቱ አሚነ እግሉ ኣቤት ለናዮም “ይመ”። ቡን አወል ወድገም ትሰቱት። ዜነብ አሰባብ ድግም እግል ትክለቅ ረፍዐት ወከሬት። ናስር ፍንጌ አማን ወከያል ሕሹር እት እንቱ ሐንገሉ እብ ሕሳበት አምሆለለ ምኑ።

ምስወርድ አብርሃም በየኔ

ምዴርየት ስነይ ሐቲ ምነ 16 ምዴርያት አቅሊም ጋሽ በርከ እት ገብእ፡ እለ ምዴርየት እለ ለእምር ሚነት ምድር ‘መዲነት ተሰነት’ ሰበት ብእተ፡ ብዝሓም ሰነን ለብእተ ምዴርየትለ አቅሊም ተ። ከሓለት ተዕሊም እተ ምዴርየት ወብዕድ ተጠውራት እግል ልድለው መሐመድ እድሪስ መሐመድ ምን ጀሪደት ኤረትርየ ሐዳስ ለብእተም ሰሕፍዩን ኤረትርየ ፕሮፋይል፡ ሓዳስ ኤርትራ ወእርትርየ አልሐዲስ ምስል መስኡል እሕሳእያት ተዕሊም እተ ምዴርየት መምህር ዮሴፍ ኢያሱ ለወደወ መቃበለት እላ ተ፡ ቅራኣት በኪተት፡

ሰአል፡ ተጠውራት ተዕሊም እት ምዴርየት ስነይ ቀደም ወሐቅ ተሕሪር ሚ መስል?

በሊሱ፡ እትለ ምዴርየት ቀደም ሕርየት ክልኤ መድረሰት ሌጠ ዐለየ ወህተንመ እብ ሐድ ዐደድ ደረሰ። ሐቅ ሕርየት ላኪን እት ምዴርየት ስነይ ሰማን ረውደት ዲብ ለሀለየ፡ ምን መኣንብታይት ደረጀት አስክ ካልኣይት ደረጀት 27 መድረሰት ሀለየ። እምበል እለመ ምህሮ ዐባዩ ለልኣደርሰ ብዝሓት ንቀጥ ክሱታት ሰበት ሀለየ፡ ለዐቦት ወመትመዳድ ተዕሊም እብ ዕጽፋት ውሰክ እንረክቡ። እትለ ምዴርየት ሕኩመት እት ተዕሊም እስትሰማር ብዞሕ ሰበት ወዳት፡ ምነ ዳሕያት መድረሰት ለአለበ ይህሌት።

እት ገሌ ዳሕያት መዐደይ ጋሽ፡ ለሽዑብ እት ምሮ ድዋር ለትጀመሪ ሰበት ኢኮን፡ ምን መድረሰት ረዩም ህለው። ላኪን እተ ሐልፊየ ክልኤ ሰነት እብ እዳረት ምን ገብእ ወመክተብ ተዕሊም እበ ገብእ ዲቦም ተዕቢኣት፡ ገሌ ሐድ ተቅዩር ርኩብ ሀለ። ሰለሰ መድረሰት እት መዐደይ ኬን ምን ሕሊል ጋሽ ክሱታት እሎም ሀለየ። እት ዳሕየት ፋንኩራዊ መሆኔ ወሰክ መዳርሰ ክሱት ሀለ። እለ እት ወሰክ መጽእ ለሀለ መዳርሰ ሀይ ምን አምኣት፡ አላፍ ዐደድ ደረሰ እንዴ ትከበተ ለአደርሰ ሀለ።

ሰአል፡ ከም ደረሰ ህለው እኩም?

በሊሱ፡ ዕልብ ደረሳ፡ 21,856 ገብእ። ምን እሎም 9,501 አዋልድ ተን። 12,355 ህይ ውላድ ገብእ። ምን እሎም 11,627 ደረሳ። እተ ሐልፊተነ ሰነት አካዳምየት እብ ለትፈናተ አሰባብ፡ ምህሮ ለአትካረመው ቶም። ምን እሎም ለዝያድ 15,000 ደረሳን እተ ተሌ አፍሱል ናይ ሰነት ድራሰት 2023 ለሐልፊው እት ገብእ፡ 70 ምእታይት ምን ደረሳን ሐሱፋም ህሌን። እለ ዐደድ ሐሊፍ ምስል ሐልፊ ሰኖታት እት ልትረኤ፡ ውሰክ ሀለ። ሰበቡ ህይ ወራታት ደረሰ ወአድረሶት አዜ ዲብ ሰፋየት ገዱ ልሄርር ሰበት ሀለ።



ሰአል፡ እለ ፍገራት ሰኔት ምን ሚ ተ ትብል?

በሊሱ፡ ሐቲ፡ ለልትህየብ ሀለ ተዕሊም እት ሰኔ ወሰፊ ገይሰ ሰበት ሀለ፡ ካልእ ህይ ለመጽኡን መደርሲን እንሰር እበ ነህደቦም ቱ ድሩስ አግቡይ አድረሶት ወላመ ልትወዝዖ ዲብ መደርሲን ብሹላም ወለሐሰው ሰበት ቶም፡ ለድሩስ እት ለሐሰ ተጠውር ልትዋሌ ሀለ። ፈሀም መጽተመዕ ዲብ ተዕሊም፡ ምነ ናይ በዲር አዜ ለሐይሰ። ነዋቅስመ አሉብን እግል ኒበል ይእንቀድር። መሰለን፡ እተ ዲብ ብሩር ለሀለ መዳርሰን አዋልድ



ክምለ ልትሐዜ ሻርከ ኢህለየ። እተ መዐደይ ጋሽ ለሀለ መዳርሱ መሻረክት አዋልድ እግል ተሀሌ ልሰዕ እንሸቄ ዲብ ለህሌን ጋር ቱ። እት መዲነት ስነይ ላኪን፡ ዐደድ አዋልድ ወውላድ አክል-ሕድ ሀለ እግል ኒበል እንቀድር። እት ካልኣይ ደረጀት ህይ አዋልድ ምን ውላድ በዝሐ። ሰበት እለ ተቅዩር መጽእ ሀለ። ለሄራር ተጠውር ላኪን እት ሐቲ ዶል እንዴ ኢገብእ፡ እብ ምልሃዩ ቱ መጽእ ለሀለ።

ሰአል፡ መትመዳድ መዳርሰ እተ ዳሕያት ከአፎ ቱ?

በሊሱ፡ መኣንብታይት ደረጀት እት ኩለን ዳሕያት ክሱታት ተን።

ተጠውራት ተዕሊም እት ምዴርየት ተሰነይ

ምግባይት ደረጀትመ እት ሐምስ ዳሕየት ብነ። ካልኣይ ደረጀት እት ዐሊ-ግድር ወተሰነይ ክልኤ ሀለየ። ሰበት እለ ካፊ መዳርሰ ሀለ፡ ወሪም ህይ እት ካልኣይ ደረጀት ምን ሰቦዕ ኪሎምትር ለኢረይም መሳፋት ብነ። ዳሕየት ፋንኩ ምን ስነይ 30 ኪሎምትር ሰበት ተ፡ ለሬመት ህታተ። ደረሳን ምን ዐሊግድር ወተሰነይ አስክለ ቀርበት እሎም ካልኣይ ደረጀት ገይሶ። ደረሰ ፋንኩ ላኪን፡ ምስል ውዛረት ተዕሊም እንዴ ትፋሀምን፡ እት ቦርዲን ክም ለኣቱ እንወዳ። እትለ መዲነት ቤት እንዴ አጀረው ለደርሶ ደረሳመ ብነ።

ሰአል፡ ዐደድ መደርሲን ምስል ደረሰ ዶል ልትመጣወር ህይ?

በሊሱ፡ ዐደድ መደርሲን፡ 610 ገብእ። እለ ካፊ ቱ ምንመ ይእንብል፡ ኩሉ ወቅቶም ለሰብሎ መደርሲን ገብአው ምን ገብእ ካፍያም ቶም። አግቡይ አድረሶት ለኢደርሰው መደርሲን በሀለት እብ ብዕድ ምህናት ለትደሐረው

ወክዶም ዲብ ድራሰት ኢለኣቱ፡ ከእለ እግል ግባሌሕ እት አካዮም እግል ነአድርሶም ዮም ዓመት ክልኤ መድረሰት ክሰትን። እብ ጀሀት ውዛረት ተዕሊም ምህሮ እት ኩሉ ክም ልትባደሕ ገብእ ምንመ ሀለ፡ እብ ጀሀት እዳራት ለተርፍ ጋራት ሀለ። ሰበት እለ፡ ዲብ ዳሳት እምበል ክራሲ ወበኣት ሰኔት ለልኣደርሰ መዳርሰመ ብነ። እበ እለ እንመልክ እንዴ አንበትን፡ እት አትባጽሖት ምህሮ እንሸቄ ህሌን። አብደዮት ቅዌት ሐድ ሀለ፡ ወለደርሳመ አንሳት። እትለ ምስል ሰብ ሸርከትነ ላቶም ልጃን ደገጊት ጅሀድ ክም ለአትሐዜነ ልትፈሀመን።

ሰአል፡ ለመዳርሰ ብናሁ ከአፎ ቱ?

በሊሱ፡ ምነ 27 መድረሰት፡ ለሰቦዕ እት ዳሳት ለአደርሰ ለህልዖ ተን። አርበዕ ህይ እት ብነ ሰኔ ወምስሉመ ዳሳት ብእተን። 12 መድረሰት ላኪን እብ ሕኩመት እንዴ ትበነየ፡ ዲብ ብነ ሰኔ ወክነባት ለአደርሰ



መምህር ዮሴፍ ኢያሱ

መታብዐት አጀኒቶም፡ ሐዘቶም ዲብ ትትወቀል ትሄርር ህሌት። ምነ ደረሳን ጃምዓት ለልኣቱ ወዲብ ደረጀት ሰኔት ለበጽሖ እት በዝሐ መጽእ ለህለው አዜ ቱ። ለፍገራት ጅሀድ ናይለ ሽዑብ ወሕኩመትመ እት ትትሓየስ ትመጽእ ህሌት። እት ማትሪክ ንቀጥ ለልኣመጽእ ደረሰ አክለ በዝሐውተ፡ ላመ ሽዑብ አትሐዘየት ምህሮ እት ልትፈሀመን ገይሰ ሀለ።

ሰአል፡ እምበል አካዳሚ፡ እት ብዕድ ነሻጣት ደረሳኩም ሚ ከደማት ረክቦ?

በሊሱ፡ እት ነዳፈት ድዋር፡ ሽቲል ዕጩይ፡ አሰራቶት ዋገዕ ውብዕድ ኪዋታት ሻርኩ። እት ሸቅል ከረም፡ እብ ብዝሐ ነአሻርክ ህሌን። መድረሰት ሳግም፡ እት ሸቅል ከረም ትከሰእም ለህሌት ደረሰ፡ ሸቅሎም ቀሊል ኢኮን። መሕበር ወጠን ሸባብ ወደረሰ ለነዝሙ ናይ ርያደት ወሰቃፊት ጅግራታት ዲብመ ሻርኩ። አስክ እት ብዕድ መሓብርመ ሐዘቶም ውቅል ተ። ምስል መሓብር ወጠን ክም ሸባብ ወአንሳት፡ ፖሊስ ምስልነ ዕላቀት ሰኔት ቦም።

ሰአል፡ ምን ለተርፊ ምን ለሀሌ በክት እግልካ ቱ መምህር ዮሴፍ?

በሊሱ፡ ክል ዶል ረውደት አሳስ ናይለ ተሌ ሄራር ተዕሊም ተ። እት አወላይ ፈሰል ለደርሶ አጀኒት ምሮ ፈሀም አለም። ለሰብ ህይ፡ 18 ምእታይት ሌጣ ቶም እብ ዋጅብ ረውደት እንዴ ደርሰው ለኣቱ ለህለው። ለረውደት እብ ኢፈሀም ናይለ ሰነን፡ ሕስር ልትህየበ ኢህለ። መሰለን፡ ምነ ዮም ዓመት እት አወላይ ፈሰል ክቡታምም ለህሌን 3500 ደረሰ፡ ለ500 ሌጣ ቶም ረውደት እንዴ ደርሰው እት አወላይ ለትሰጀለው። ሰበት እለ፡ ሕኩመት እትለ ተዕቢኣት እግል ተአዚድ፡ መጽተመዕ ህይ ፈሀሙ እንዴ ወቀሉ፡ እለ አሳሰለ ተሌ መራሕል ላተ ረውደት፡ ሕስር እብ ወሳይል እዕላም ወመጽተመዕ እግል ልትህየቡ ወልትከደም ዲብ ቡ። ምስል ለኢትበገሰ አጀኒት፡ ሐፊመ መቅደረቱ ሐቲ ሰበት ኢኮን፡ አክል-ሕድ እግል ልሄርር እግልን ኢቀድር። ሰበት እለ፡ ዋልዴን አጀኒቶም ምን አርበዕ አስክ ሰስ ሰነት እተ ሀለ ዓማር ረውደት እግል ለአተትሙሞም ወጅብ።


ሰው-ረት ኤሪትሮፖ
እትለ ናይ ሰልፍ መትኦምባት
ግድለ ስለሕ ዲብ 60ታት ፍንጌ
ምናድሊን ሰው-ረት ወጃሽ አባይ
ገብእ ለዐለ መዓርክ ምን ምናድል
ሀይለስላሴ ወልዱ ለከትብዩ ክታብ
ዐዋቱ ለትነሰኣቱ። ከእግል ዮም
15ይ ክፈል



መዐረከት አሜሊ - 20 ማዮ 1962
ሲጋሁ ለትበለዐ ሀይክል-
ዓጭሞታት ግናዘት እግል ትፈርግ
ምሽክለት ቱ። ከሉ ዓምታት
አደሚ ሕድ ለመሰል፡ ሕብሩመ
ጸዐደ ናይ ምንቱ እግል ቲበሉ!
ናይ ለገብእ ልግበእ እንዴ ነሰአው
እግል ሊጊሶ እቡ ምራዶም
ዐለ። ላኪን፡ እበ እንክር ኦሮ
እግል ሀይክል ክም ረአው፡ ናይ
መደት ቅድምት እንድኢኮን ናይ
አዜ ወናይ ወቅት ቅሩብ ሰበት
ኢመሰለ እቶም፡ እምበልሁመ
ሀይ ልብል ክቡብ፡ “ናይ እናሰ
ሰኒ ረዩም፡ ምስል ሕጭር ሓምድ
ዶል ተኣትጃግሩ ከሉ ረአሱ
እግል ለአትሐሰዮም ወለኦቃሽኾም
ለኢቀድር ፈርግ ሰበት ዐለ
እቱ፡ ፈሽለው ከእንዴ ሐድገው
ጌሰው።”
እብሊመ ኢጸብረው፡ ወክድ
ሓርመ እተ ሓምድ ልትሐረክ
እቱ ለዐለ ድዋራት፡ ሽክ ለወደው
እቱ አቅብር ሐዲስ እግል
ለሐናፍሎ አንበተው። ሓጀት
ትርድት ሳደፈቶም። እበናይ
ኢኮን ወዓጭም ላኪን ትክ
ለብህለት ወሰኒ ለትረተዐት ሓጀት
ገዛ። ክም ገንሐው ሀይ ማይ
ጨቅመው ሌጠ። ለቀብር ለሀይ፡
እግል ሓምድ እብ አርወሐቱ ክም
ዐለ ለልኦምሮ ሰብ ንዋይ ቶም
እብ ዓኒ እት ለአምሮ ለአዳለው
ከሓጀት ለቀብረው እቱ።
“ሕኩመት ግናዘት ሓምድ ተሐዜ
ህሌት” ክም ሰምዐው፡ እግል
ሐጋረት ለቀብረው ግንዳይ ሀይ
ዐለ።
እሊ ክም ውልዋል ዶልክ እብ
ህግዩ ሐቱ ሽብብ ለዐለ እሰባት
ለአለቡ ከበር እግል ልትኣክድ፡
ወግናዘት ሓምድ’መ ሰበት
ተሐገለት፡ ሰብ ሰልጠት ገለቡቶም
አው መትሃላጎም ኢንቅሱ።
ለብዕድ ንእዘም ምኑ፡ በስ አማን
ተ ወለሐሰት እግል ለአክዶ
ለኢበለሰው እበነት ይዐለት።
አስክለ ለአትሸክክ ድዋራትመ
ሰኒ ለልኦምሩ ነፈር ለአከው።

ለናይ ሰልፍ መዓርክ 60ታት
ለልኣክ መስኡል ዴሽ ጀነራል
ከበዴ ገመዳ፡ ወለትለኣክ ሀይ እት
መደት ሽፍትነት ምስል ሓምድ
ዕላቀት ሰኔት ለዐለት እሉ ሐገስ
ተምነዎ። እብ ከሊማቱ።
ሓምድ ዐዋቱ ሞተ ክም
ትበሀለ፡ እግልዬ ወእግል ተኽሌ
ተክሌጋብር ሕኩመት ጊሶ
ከበሩ ድለው ከምጽኦ ቤለው
ከለኣከው። ለዶል ለሀ ጀነራል
ከበዴ ገመዳ ለልትበሀል ናይ ሞር
ቃእድ ዐለ። ኖሱ ትላኪኒ ወክም
ጊሰኩሁ፡ “ሓምድ ሞተ ወለ
ሀለ እንዴ ጊሰክ አክድ” ቤሌኒ።
ኣነ ወተኽሌ ሀይ ትበገሰነ።
ተኽሌ ለረክበቱ ከንዶኣ፡ እት
ገበይ ተርፈ። ኣነ እብ መኪነት
ሕኩመት ባርንቶ ጊሰኩ። ምኑመ
አስክ ዐሊ-ግድር በጽሐት። ዲቡ
ሓምድ ሞተ ቤለውኒ። እት
አንቶሬ እግል ልትቀበር 10
ገመል ነሰአው ቤለውኒ።
እትሊ ሐገስ ተምነዎ እምበለ
‘ቤለውኒ’ ለአክደዩ ሸይ ይዐለ።
‘ቤለውኒ’ ሌጠ እንዴ ጸብጠ

ዕላጅ አስክ ካይሮ ሳፈረ። እት
ካይሮ፡ ሓምድ “ምን አጅል
ሰው-ረት፡ ለሰልፋይት ጠልገት
ለከፍት” እት ልብል ተሃገ።
ለሰው-ራይት ልጅነት፡ ሓለት
ሓምድ እት ቂመት እንዴ ኣቱት፡
ምስሎም እግል ልግበእ ሰበት
ቀረረው፡ ናይለ ሰው-ረት ጀነራል
እግል ልግበእ ሸዩመው። እብ
ጀህት ብዕደት ሀይ፡ ሓምድ ምን
እሊ ወክድ እሊ እት ፓኪስታን
ተድራብ ዐስከሪ ነሰኦ ክምሰል ሀለ
ትሰመዐ። ምን ህግዩ እት ህግዩ፡
ገሌ አንፋር ሀይ እት ሐቱ መጀለት
ሓምድ ልባስ ዐስከሪ ላብስ እት
እንቱ ሰወር ክም ረአው ለሀድጎ።
እት ረአሰለ እብ ማርሐት
ሓምድ ዐዋቱ ለገብእዩ ሐምስ
መዐረከት፡ እት ከረን ቀነብል
ወጥለግ ክም ትላክፈ፡ እት
አልገዴን እጅትመዕ ሸዩም (ዝር)
እብ ለከፍ ክም ትፈንጠረ፡ እብ
ክሱሱ ብዘሕ ትዳገመ። እብ
ግዕባቡ አብሳር አባይ እንዴ ፈሸለ፡
መዕነውያት ሸዐብ ሰኒ ወእማን



ክም አቅበለው፡ ካልእ ዶል እንዴ
ትከማከመው፡ ተሐይስ ተሐምቅ
እንዴ ቤለው፡ ናይ ምስተቅበል
በራምጆም እግል ልኡትኖ፡
ሓምድ ዐዋቱ እት ለሐዙ
አንበተው። ክምሰለ እሰልፍ እንዴ
ትጀመዐው ወትጋመው ኤታን
እንዴ አፍግረው ለትዐወተው፡
ካልእ ዶልመ ምኑ ለልትደቀብ
ዐመልያት እግል ሊደው፡ ምስሉ
እግል ልትጋመው ሐዘው።
ላኪን፡ ክምሰለ ለሐሰበው ኢገአት

ሐቆ ሳምን ምን መዐረከት
አሚሊ አምዕል ሰንበት-
ዐባይ፡ ምድር እንዴ መሰ ክም
ዐወድወደ፡ ሓምድ ምስል ሰስ
መልህያሙ እት ተሸኪል ሳክባም
ዐለው። ሓምድ ሰምጥ ክቡብ
ወለብዕዳም ርዩይም እንዴ
ቤለው አትካረረው። ላሊ፡ እት
ወክድለ ጸለምት ሓምድ እንዴ
ቀንጸ እግል ክቡብ፡ “መንዱቅዬ
ሰምጥከ ውደዩ” እት ልብል
ድርክ አበለዩ ዲቡ። እግል
ዝናሩመ እት ክምሰልህ።
ክቡብ እግል ሓምድ “አፎ
ቱ እንከ መንዱቅዬ ትብለኒ።”
እት ልብል ትሰኣለዩ። ሓምድ
“ኣነ ሕሙም ህሌት” ወምነ
ወኪን ሐበት ኢትሃገ። ነጸላሁ
እንዴ ትገልበበ ሌጠ ሰክበ።
ሐቆህ ከሊመት ኢትሃገ።
ክቡብመ ለልኣትሻቅል ሸይ
ሰበት ይዐለ እግሉ፡ ካልእ ዶል
ኢትሰኣለዩ። ሳክባም ትመዩው።
ጽቤሕ ምድር ሓምድ እንዴ
በድረ ለፈዜዕ ነፈርመ ይዐለ
እቶም። አትኒን አስቡሕ ላኪን
ቀደሚሁ ቀንጸው ከትሰለው።
ናይ ቅርብ ሰበት ገብአት እቱ፡
“ደሐን ይህለ ገብእ” እንዴ ቤለ
እት ልትባደር ሓምድ እግል
ለሀርስ ለመጽኦ ዐዋቱ መሐመድ
ፋይድ ዐለ። “ሓምድ፡ ሓምድ”
እት ልብል እብ ሰሚቱ እት
ለአድህዩ ነዝዝዩ። ክቡብ ላኪን
ይዐጅብዩ። “ያሼኽ! አፎ ለዓርፍ
ኢትሐድጉ! ሕሙም ሰበት
ትመዩ ልስኩብ ሕደጉ” እት
ልብል ሰበት ትቃወመዩ፡ ምኑ
ክም ረይም ወደዩ። እሊ ለፈሀመ
አሕመድ ጋድፍ እብ ተረቱ
እት ሓምድ እንዴ ጌሰ ዳምሀይ።
እለ ዶል እላመ ሓምድ እት
ሰካብ ጥዑም ክምሰለ ሀለ ነፈር
ኩስኩስ ኢቤለ።
ለምሰሉ ትመዩ ክቡብ በዐል
ሰብር ወሃድእ ቱ ለዐለ። እብ
ምልሃዩ፡ “ሓምድ ቅነጽ፡ ጸሓይ
ፈግረት ወምድር አምዐለ” ቤለዩ
ሰካብ ከልኡ ለሀለ እት መሰል
ዲቡ ወእት ልትአሰፍ ምኑ።
ሁቱመ በሊስ ሰበት ሰኣነ ትሸከከ።
እብ ሸፋግ እግል አሰራር እዴሁ
ወልቡ ተማተመ። ገርቡ ሕፋን
ዐለ። ሀንደገት ልቡ ላኪን
አትካረመት። ለዶል ለሃቱ ርሐ
ለፈግረት፡ አስተሸህደ፡ አትኒን
28 ማዮ 1962።



1. Hasan Adem Omer 5/8/1966 Ad Sheikh
2. Mohammed Abdalla Ali Osman 5/8/1966 Ad Sheikh
3. Mahmoud Ibrahim Ali Bakhit 5/8/1966 Ad Sheikh

አቅበለ። ፍላን እተ ቀብሩ ሓድር
ዐለ ወኖሱ እበነት ከፊት ዲቡ
ኢቤለ ምን ገብእ እግል ትእመኑ
ኢትቀድር። እብሊ ሀይ እምበለ
ሰምዐት ረኤት ሰበት ኢቤለ፡ ሐብሬ
ሳፍየት እበ አቅበለ እግል ኒበል
ይእንቀድር።
ለሰሚት ይዐለት እቱ ተቅሪር
ፖሊሰመ፡ ለትሐባለክ ጌማም ሌጣ
ቱ ለቀደመ።
...ሓምድ እብ ጸልዐት ከብድ
(ቅርሐት) ልትጀረስ ሰበት ዐለ፡
ሐቆለ ናይ ደንገበ መዐረከት
ምክራዩ ቅዊት ህሌት። ምነ
ሸፍትነት ለፈግረ ዲበ ምዕል
አስክለ ለትሸረበ እቱ ወቅት፡
ሓምድ ሐሊብ ሌጠ ሰቱ ዐለ
ድኢኮን። እክል በሌዕ ይዐለ።
እብሊ ሰብ እሊ ሀይ፡ ሰኒ ቀጢን
ወሄራርመ ለአትዕቡ ዐለ...
... ሐቆህ፡ ሓምድ ከሰለ እንዴ
ጌሰ ጭገሩ ቀረጨ፡ ልባሱ ቀየረ፡
እብ ገበይ ሰፋረት ብሪጣንዩ እት
ካርቱም ለመጽአዩ ጀዋዝ እቡ
እንዴ ትነፈዐ ሀይ፡ እግል ዝያደት

ሰመ ዐርገ። እብሊ ሀይ፡ እት
ክፍለት 1962፡ ንዳል ኤሪትሮፖ
ዝያደት እት ልትአመር ለጌሰ እት
መደት ገብአት።
ለአባይ እግል ልሻቅሎ
ወለኣብሀርሮ እንዴ ትበሀለ አስክ
ለትፈናተ አራዲ ለጌሰው ከረ
ዑመር እዛዝ፡ ሀደፎም እንዴ
አግደው፡ ዐደድ ቅድረቶም ምን
ቀበት-ዐድ ወካርጅ መናዱቅ፡
ቀነብል ወጥለግ እንዴ ረክበው
አስክለ ምነ ትበገሰው አካፍም

እሎም። እምበለ ምስል ሓምድ
እንዴ ሐድገዎም ጋይሳም
ለዐለው ሐምስ ሰሉሓም፡ ብዕድ
ነፈርመ ኢረክበው። ሓምድ
ሰበት ይዐለ፡ “እተየ ሀለ።” እት
ልብሎ ትሰኣለው። “እንዴ ሐመ
እግል ልትዓለጅ ሱዳን ጋይስ
ሀለ” ቤለዎም። ዝያደት ከሉም
ግንድፍል ይአምኑ። ጽዋር
ወወጅህ ዐዋቱ መሐመድ ፋይድ
ክም ረአ ሀይ እት ሸክ አተ።
* * *





ዓፍዩትን ምን ጽብጥፍ ጽብጥን

መልቀም ከደን አቀጥፍ ወአቅሩድ ወእት ግረህ ወአፍያት ለአልመድናሁ ፈርያት ዕጩይ፡ ቀጠቅጥ ወአሰዕር ወድ አዳም እብ ተጅርበቱ አዩቱ፡ ለሳሬ ወአዩቱ ለሰምም፡ አዩቱ ነብረ አዳም ወአዩቱ ነብረ ንዋይ አመረዩ ከሐቲክ እት መዓለ እት ልትነፈሰ እብ ነብረ ወዜመ አግቡይ ቅፍር ምንመ ለሀሌ ነብር እቡ ሀለ። ምስል ምጽአት ዘበናይ መሳንዕ አድወዩት፡ ለሙጅተማንት ልትናበር እቡ ለዐለ አምር መስክለት ሩክስት ወምልክዩት እንዴ መጽአት ለዕልም እት ሕዱዳም ዳርሳም እግል ልከረዕ አንበተ። ለእብ መሳኔዕ መጽእ አድወዩት ሀይ እት ክለ ዐለም ልትዘቤ ሰበት ገብኤ፡ ለናይ ተጅርበት አምር በደል ወሴዕ ወልትደረሰ ሰብኡ እት ገይሰቡ እት ልውሕድ ወልትረሰዕ ጌሰ። እድንደ ምስል እሎም አምረት ደወ ዐድ ልትቀበር ለሀሌ አምር ገሌ እግል ተአትርፍ ምኑ ምን ተአዩሰት፡ እግል አምረት እት መሓብር ትክምክሞም ወለልትነፍያ እቡ አቅሩድ ወአቀጥፍ ጽበጡ እት በሐሰ እንዴ አተ እብ ደሐነ ለተአከደ ገበይ እት መናፊዕ ክም ልውዕል እግል ቲዴ ትጸገም ሀሌት። አድወዩት ሌጠ እንዴ ኢጉበእ ለእት ክል ምዕል መንበረትን ንትነፈሰ እቡ እት አፌትን ወቅንቤትን ለእንዘረኦ ፈርያት ሚ መናፊዕ ዓፍዩት ክምቡ ዶል ልትአመር፡ ምን ሕኔት ግምሽ ነሐልፎ እት መንፈዐት እግል ነአውዕሎ ለሀሌ መትሐሳርመ እት ልትወቀል መጽእ ሀለ። እት መሀረጃን ኤረትርዩ 2023 እት ኤክስፖ ዕፌ ፈርያት ሐርስ ቃርብ ዲቡ ለዐለ አዳራሹ ለተኪዳን ካሕሳይ ለትትበሀል ሙናድለት ገሌ ፈርያት ሐርስ ቅድምት ዐለት።

ሐበትሶይ፡ ሰንፈኤ፡ ሀርድ፡ አቀጥፍ ቡን፡ ከርከዴ፡ ነዕነዕ፡ ጼኑአዳም፡ ሮዝማሪና፡ እንጣጥዕ፡ መቅሞቆ . . . ቅድምት ዐለት። ብዝሓት ሻባት መጦረ እት ቤት ለልዳሌ ነብረ አጀኒት፡ መትጋሪሚ ገና፡ ጽቤሕ ለጉበእ ሕልበት፡ ሸር፡ በርበሬ . . . ለቀደመያመ ዐለዩ። ክለን መናፍዕለ ነበሪት እግል ቤጽሐት ሸረሐ ወለዘብዩ ዐለዩ። አሰይደ ለተኪዳን ላኪን ዝያድ ሕሰረ እት አፍዝያትቱ ለዐለ። ለተኪዳን እብ ቅድረተ እት አትአመርት መናፊዕ ዓሻብ፡ አቀጥፍ ወፍሬሁ ሚ ትወዴ ክም ሀሌት ዲብ ትሸርሕ ክእነ ትቤ።

“አነ እለ ወዴኮ እንዴ እቤ ለእትሃጌ እብ ኢኮን አቀጥፍ ወመናፍዕ በሐርቱ። ምነ እለን አምረት ሀሌኮ ገሌ እብ ሸክል ስተይ፡ ገሌ እብ ደጊግ፡ ወገሌመ እብ ብለዕ አዳሌት። እት እዴን ዲብ እንቱ ክመ ልትሐዜ ንትነፈሰ እቡ ሰበት ይሀሌን እግል አትፋቃድ ለወዴክወቱ። እግል መሰል ዕጩት ቡን ሐቱ ትለከፍ አለበ። ፍሬህ ቡን ወቅሸር ፈግር ምኑ፡ ቀጠፈ ሀይ ሻሂ ጉብእ። ቀጠፍ ወግሬመ

ሻሂ ጉብእ። በዲር ዲብ ሚዳን ቀጠፍ ሻሂ ዶል ይእንረክቡቱ ንትነፈሰ እቡ ለዐል፡ ደአም ህቱ ደዋቱ፡ ሻሂ ቀጠፍ ዘይቱን ዮም ምነ ሕሩይ ጋብእ ለሀላቱ፡ ምን ኮለስትሮል እኩይ፡ ምን ምዕደት፡ ምን ድዕፍ ደም ለዳፊዕ ወአፍ ለለቀዴ ክምቱ ልትአመር ሀለ። እብ ዓመት ለአቀጥፍ ሽብሕ እት ገርብ ወአሰራር እግል ልትኬለል በክት ሰበት ኢሊሀይብ ምን ኮለስትሮል ወምስሉ ለመጽእ ከረ ጀልጠት ልብ ወሐንገል መሰል ክም ለአድሕን እብ ዕልም ብዩን ሀለ። ከአቀጥፍ ረአዩቱ ልብ ወዕን ትሸፊ፡ ብልዑ ወስተዩ ሸፋቱ፡ ፡ እብሊቱ ለተሐሰርት እቱ ወእበ ቅድረቼ ለአነ አምረ ሸዐብ እግል አትአምረ ለትበገስቱ።”

እብ ወሰፍ አሰይደ ለተኪዳን፡ ሕናቱ ለኢነአምሮ ድኢኮን ሸዐብ ክሰሰን ለዐባዩ ለአሙሮ ወልትነፍያ እቡ ነብረወ። እት ብሩርን ደወ ፈርመሽያት ምስል ሰውረትቱ ለመጽአዩ ድኢኮን እብሊ አቀጥፍ ወአቅሩዱ ልዳዌ ለነብረ። ለአጅያል ሓር ላኪን እለ ምስለ ቀዳምያም ለጸንሐዩ አምር ኢከሰበ ምኑ፡ ክም ድንጉር ወኤዝያይ ልርእዮ ዐለ።

ህቱ፡ እትሊ መጃል እለ

እግል ክሉ ለአግዋር ሸትል ሀበተን ናይ ብዕዳት በደዩ ወናዩ እላተ ሰኔት ቴለተኒ። ዕጩይ ሕነ ዲብ ኤረትርዩ ሀለ ላኪን ትነፈሰን ምኑ ኢመሰለኒ፡ ምን አርድ ብዕድ ቱ መጸኢነ ለሀለ። ላኪን እት አርድን ክም ሀለ አምር፡ እምዬ እት ምድር ሳሆ ሕናቱ ለልትበሀል ደዋሒ እብ ብዝሐ ዕጩይ ሕነ ለቡ ክም ሀለ ትደግም እዩ ዐለት።

ለትፈናተ እት ከደን በቅል ለነብረ ክም ከረ ጠሰኔ ለልትበሀል ቀጠፍ ዮም መናፍዑ ምን ተአመረ ክም ሻሂ ልትሰቱ፡ ቀመም እንዴ ገኦ እት ነብረ ለአቱ፡ እት ዓፍዩት ክም ቀጠፍ ዐጃይብ ልትወሰፍ ለሀለ ጽበጡ እንዴ ደሊኮ እግል አዳምዬ እግል አትአምሩ ረቅበት ወዴኮ። እግልሚ ነኣይሸ ዲብ ሕነ እት ክል አካን ዐለ፡ እት ክፍለት 70ታት እብ ‘ዕግርግር አሰመረ’ ለልትአመር አያም፡ ቀጠፍ ሻሂ ክም ኢረክበዩ እማትን ሻሂ ጠሰኔ ለአሰትያነ ዐለዩ ወምን ከደን ቤትገርጊስ እንሸምጥ ወነመጽኦ ነበር። ከለሕሰር ጸንሐ እቼ ወምን ጠቢዐትቼ እግል አምር ሰበት ሐዜ ሰኣል እፈቱ።”

ገሌ ምነ እት መዕረድ ቅድምቱ ለዐለት ሐበት ሶደ ወሰንፈኤ ሌጠ ምን እነሰእ መናፍዑ እንዴ ዐለብክ

መሳኔዕ ሐሊብ ዲብ ጅብነት ለአትዉ ሀለው። ለበስከዊት ውብዕድ ሓጃት ሸቅዩ ለሀለዩ አዋልድን ልትነፈሰ እቡ ሀለዩ። ዮም እብ ክሰሰ ሐበት ሶደ ልትነሸር ለሀለ ሐብሬ፡ “እምበል ሞት ምን ክሉ ትዳዌ” ለትብል ሂገ ትደጋገም ሀሌት። መሳኔዕ ግርመትመ ዜድ፡ ሳቡን፡ ክሬማት ወለመሰሉ ሰነዐ ምኑ ሀለዩ።

ሰንፈኤትመ ምን ሐበት ሶደ ኢተሐምቅ። ሰንፈኤ ራድኢት ሻፍገት ለለሀይብ ደዋቱ። አመት አለበ ፍጋር ምን ረክበከ፡ ቅርጩት ምን ብከ፡ ዶል ትነፈሕ አው ልብከ ምን ቀትለከ በሀለት ምን ትባለል ሐቱ መንከት ሻሂ ሐቆ ትቅሕም ትሻፈክ። ነብረ ለኢትናሰበክ ምን ትበልዕ አው ምን ትከመድ፡ ሰንፈኤ ምን ሐቱ መዕለቀት ሻሂ ለኢበዝሕ ቀሐምክ ምን ጉብእ ለሀውት ምንከ። እማትን ሐራሰ ጥበ አጊድ ኢከረ ምንጉብእ እት ሐሊብ ውጽር አውመ እት ማይ ሞቀ ሰንፈኤ እንዴ ወደዩ ለሀይበህ ወነቲጀቱ ልርእያህ ነብረዩ። ዮም ሀይ ድራሳት ክም ጉብእ ሐሊብ ክም ለአቀዝር ተአመረ። እንበል እለ ገሌ ሳክብ ለዐለ ሆርሞናት ክም ቀስቅስ ወፈቃዲት ክም ለአዳብር እብ ዕልም ተአመረ።



አሰይደ ለተኪዳን ካሕሳይ

ለቀድረት ሀይ እት ሳምናይ ሙእተመር መሕበር ወጠን አዋልድ አንሳት ኤረትርዩ ምነ ዐለ እተ ውቀት ለኢሊሀይብ ሸቅል ተንፈዝዩትለ መሕበር ትሳረሐት ወእት ብዕድ ሸቅል ይምምት ሰበት ኢሀሌት ናገት ረክበት። እት ሐሽ ለትፈናተ አቀጥፍ ወዕጩይ አግመለት፡ ምስል እግል መሰለ ሕሰራት እግል ትከክም ሰበት ሐዜት እት ሰነት 2015 እት መሕበር አንሳት ሐረሰቶት እግል ትእቱ ጠልበት። ውዛረት ሐርስ በቃዕተ እግል ተአክድ ለሐሽ ረኤት ክምስልሁ መግርሐትለ መሕበር ረኢያሁ ወቅቡልዩት እንዴ ረክበት ዕዱ መሕበር ጉብኣት። እለ ሀይ ዝያድ እተ መጃል እግል ትትሐሰር አትናዩተዩ። እግልሚ ሰብ ምህንት መሓደራት እብ ለሀ ለሀዩበን፡ አብሸርክን ልቡለን፡ ፈርያተን እግል ለርእዩ ወለዝብዩ እት ወርሕ ሰለሰ ምዕል አካን እንዴ ሀበወን ለርእዩ ወለዝብዩ። ምን ቅሩብ ሰበት ታብዕወን ውዛረት ሐርስ ክም እም ወወዘር ክም አብ ናይለ መሕበር ትወሰፎ አሰይደ ለተኪዳን።

እት ሕድ ለመሰል መጃል ለትክምከመ አዳም ዶል ልትራኩብ ወለመሕብር አፍካር ሐዲስ እግል ልምጸእ ገበይ ወግማት እግል ትትባሰር ሰበት ሰዴ፡ ምነ መትክምካም ብዙሕ መካሰብ ረክበት። ውቀተ እት አክደር ወግማል ሰበት ትነፈሰት እብ ሀይ ደሚረ ርዩሕቱ። ምኑ ለትረክቦ መክሰብ ማል ሐድቱ እግል ዕዳገ ለጉበእ ብዙሕ ፈርያት አለበ። እግል ለበስጠ ለእግል ልርኤ መጽእ ሸዐብ ገሌ አምር እንዴ ከሰበ ገይሰ ዲብ ትርእዩቱ።

እት ደንገበ አሰይደ ለተኪዳን “ሕነ ዩም አለቡ ጅንሰ አቀጥፍ ብነ ወመናፍዑ እግል ነኣምሩ ዐባዩን እንዴ ኢለሐልፎ ንንሰእ ምኖም፡ ነሐሽሞም ወአካናም ነኣምር እሎም። ውዛረት ዓፍዩት ለእንብትቱ ሀሌት አክቦት መዕሉማት ደወ ዐድ እግል ተአታላልዩ፡ ውዛረት ሐርስመ ለትወድዮ ሀሌት ከዘፍት ዘርእ አሰል እግል ተአተላልዩ፡ ዝያድ ክሉ ሀይ፡ ክል መዋጥን ለለአምረ እት ክቱብ እንዴ ወደ እት ገቢል እግል ለአቅርብ ትፋኔት። ለርዝቅነ ሐቆ ኢከተብናሁ ምስልን እት እንቱ ብዕዳም ክም ኖዮም ብሕታሆም እግል ለአቅሩሶ አርደት ፋይሐት ነሐድግ እሎም ሰበት ሀሌን ንክተብ ወእት ገቢልን ንንሸር” እት ትብል ትፋኔት።



እግልሚ አክል እለ ተሐሰረት፤ ለልብል ሰኣል መጸኢከ፡ በሊሰ ክእናቱ።

አነ ምን ጠቢዐትቼ አክደር እፈቱ። ቀደም አዜ ርእዩተ ለይአምር ዕጩት ምን እርኤ እሰኣል ምነ ወሚ ክም ትነፍዕ እደሌ። አሰክ ዲብ ሐሽ ጸርዬ ለእርእዩ ዕጩት ሐዳሱ ባብ እንዴ ከርከሕኮ እትሰኣል እብ። ምዕል ሐቱ ዲብ አሰመረ እት ሐሽ አሮ ዕጩት ሕነ ረኤት። እት አሰመረ ርእዩተ ሰበት ዩአምር ከፎ ክም መጽአት እግል አምር ሐዜኮ ከእተ ዐድ ከርከሕኮ። በዐል ቤት ዶል ከስተተኒ እለ ዕጩት ሕነ ከፎ ረከብክዩ ክም እቤሊ ሐቱ እሲት

ኢልትከለሰ ገሌ ምኑ እት ተሀድግ አሰይደ ለተኪዳን ክእነ ትብል።

“እግል መሰል ሐበት ሶደ እግል ደም ምን ኮለስተሮል ወሸብሕ ለአነግዩ፡ ቅያስ ሂሞግሎቢንክ ወቅል፡ ፈቃዲት ለአትሐይስ (ምን ሕማም ርሰዔ ለአነግዩ)፡ መርዘን ለሀውን፡ ጼነ አፍ ወጼነ ነብረ ለአቀዴ፡ ባክቴርያ ውብዕድ ጀራሲም ክም ኢበዜሕ እንዴ ወደ ነብረ አጊድ ክም ኢትፈሸም ወዴ፡ ዮም ለምን አሰዋግ ንዛብዩ ሕበዝ (ሕንግሻታት) አጊድ ለዐሸሸ፡ ለዲብ ቤት ሐበትሶደ እንዴ ወደዩ እቱ ለልትዳሌ ላኪን እብ ሰኒሁ አምዴላት ጸኔሕ። እትሊ ወቅት እለ ለመንፈዐቱ ሰበት ተአመረት

እት ሙጅተመዕነ እሙ ለትወፊት ምኑ ዐልቀት አቦቱ ሰንፈኤ እንዴ ሱቱት እብ ጥበ ክም ተዓብዮ ነኣምር። እማትን ዑለመ ኖሰን ተን ለናይ ጥባይ ሆርሞን እብ ሰንፈኤ ክም ለሐሳሴ ህተን እብ ተጅርበት ለአምራሁ ጸንሐዩ።

አሰይደ ለተኪዳን አምረ እግል ተዓቤ እብ ክሰሰ አቀጥፍ ወፈርያቱ ደለ ረክበቱ ክቱብ ትቀርእ። እቡ ለሀሀድግ አክትብት ለእለ ሐድገት እንዴ ሐድገት ትዛብዩ። እት መሕበር አንሳት ሐረሰቶት ክም ትክምከመት ሀይ ዝያድ ዕልም እግል ትክሰብ ወሸዐብ ለተኣፈዝዕ እቡ በክት እግል ትርከብ ሰደዩ። ታምም ወክደ እግል ተሀቡ

መሰውር፦ ክብርም ጸሃዬ

እተ ሐልፈ ወክድ ቅሩብ
አስከ ምዴርየት ማይ-ዐይኒ እንዴ
ትወጀህክ፡ አሰይድ ክፍሌ መንግስ
ናይ ዶሉ ሙዲር ምዴርየት
ማይዐይኒ፡ ዕሙማይ ሐብሬ ናይለ
ምዴርየት ወልትካይም እተ ለህለ
አሽቃል ዐማር፡ ክምሰልሁመ ናይ
ዶሉ መስኡል ፈሬዕ ውዛረት
ሐርሰ ናይለ ምዴርየት አሰይድ
ዮናስ ብርሃኑ፡ ለወዳናህ መቃበለት
ታምም ጽበጠ ካትባም እኩም ህሌኑ
ቅራካት ኬር ወበርከት፡

ጂኦግራፊያዊ መካሪት ምዴርየት ማደ ዓደኒ፡ እብ ምፍጋር ጸሓይ ምስል ምዴርየት ዐዲ ቀይሕ፡ እብ ቅብለታይ ምፍጋር ጸሓይ ምስል ምዴርየት ሰገነይቲ፡ እብ ቅብለት ምስል ምዴርየት ደቅምሐሬ፡ እብ ምውዳቅ ጸሓይ ምስል ምዴርየት መንደፈረ ወእምኒ ሓይሊ፡ እብ ግብለት ህዩ ምስል ምዴርየት ጸርን ወደውለት ኦቶብዩ ትትሓደድ። ርሕብነ አርደ 629.1 ኪሎ መትር መረባሰ በጸሕ። አርደ እብ አድብር ወእግል ሐርስ ውጡይ ጋድምታት ለከምኸምቲ። እሊ ህዩ እግል ሐርስ ከረም ወጀራዲን ክም ልትዐመር ዲበ ለሰዔ ክልኦት ዐባይ መሓዛት መረብ ወመሓዝ ሰበነ ለልሓሉፈ ሰቦቶም፡ ሐድ 630 ለገብኦ ሰብ ጀራዲን ህለው ዲበ። ሐድ 150 ለገብኦ ህዩ ናይ ዶሉ ሐመሊት ወኩዳር ለለአፈሩ። ብዝሐ ሸሸበ 5,806 እብ ዓኡለት 24,685 እብ ትንፋሰ ነብረ። ክጡጥ መዋሰላት ርኡን ምንገብኦ ህዩ ከጥ ዐዲ ቀይሕ እብ ኩዓቲት ለልሐልፍ፡ ጸርን ደቅምሐሬ፡ ከጥ መንደፈረ ወከጥ ሰገነይቲ ሐምስ ክጡጥ ህለ እሊ።

እለ ምዲርየት እለ 62 ዐዶታት ወ14 ኡዳራት ደዋሐ፡ ሰለስ ቀውምየት ትግርኛ፡ ትግሬ ወሳህ እብ ሕበር ነብሪሁ። መናበረት ሸበ እት ሐርሴ፡ ርዕዮ ወገሌ ክፋ-ል ዲብ መዲነት ማይ ዓይኒ ወኩዓቲት እብ ትጃረት ለነብረ ምዲርየት ተ።

ሓለት ማይ ናይ ምዴርየት ማይ-
ዓይኒ እት ወደሕ አሰይድ ክፍለ
መንግሥ፡ ክም ዐዶታት ዐዲ ጋሃድ
እግል ምስተቀበል መሻክል ናይ ማይ
ሰበት በን ምን ለህለየ እቲ አድብር
እግል ልትከረየ ነሐሰብ ህሌነ፡ እግልሚ
እተ ለህለየ እቲ እግል ተአተላልየ
መሻክል ናይ ማይ ሰበት ህለ እግለን፡
እብሊ ሑዳት ዐዶታት እንዴ ሐደግከ
ለበገዝሐ አርድ እለ ምዴርየት መሻክል
ናይ ማይ አለቡ፡ እለመ ሹብህ መዲነት
ማይ-ዓይኒ ዓሲመት ናይ እለ ምዴርየት
ርኤነ ምንገብእ በዲር መሻክል ማይ
ዐለ እግለ አዜ ሳኪን ሐምስ ሶሃር
ለገብእ እንዴ ተክልነ አርበዕ ለገብእ
ኑቃዋ ተውዘዕ ህለ እግልነ፡ ከዋማይ
እግል ለአቲ ለልሐዙመ ሰሙሕቲ፡
፡ እብ አሳስ እለ ከዋ ለአተው ሰበ
መአሰሳት ህለው፡ ከምስልሁመ ጢሻ
ወዐዲ በሪን ከዋ እንዴ መደድነ እግል
ለአቲ ለልሐዙ እግል ለአቲ ከምቀድሮ
እዱልያመ ህሌነ፡

አሰይድ ክፍሌ እንዴ አትለ ሓለት
ዓፍየት ምዴርየቶም ዲቡ ተውዴሕ
ሀበክ። ምድርየት ማይ-ዓይኒ ዎሮ



አሰሪድ ክፍሌ መንግስ

ሆስፒታል ማዕየ እት ሹብህ መዲነት ማይ ዓይኒ፡ ሐቲ መርከዝ ዓፍየት ዲብ ኩዓቲት ወሐቲ ዕያደት ዲብ ቅናፍነ ክም ህለ እሎም ወደሐ። እተ ብዕድ እዓራት ደዋሒ ህዩ ሐካይም ናይ ሙጅተማዕ ህለው። ህቶም ናይ ሕማም ዓሳ (ዋጋዕ) መመርመር መልኮ ወብዕድ ሕማማትመ ልርኡ ምን መቅደረቶም ወለዐለ ገብእ ምን ገብእ ህዩ አስክለ ሰለሰ መራከዝ ዓፍየት ለሐላፉ። ዕመማይ ሓላት ዓፍየት ናይ እለ ምዲርየት ሐቲ ክልኤ ረይም ለህለ ባካት እንዴ ሐደግከ ደሐን ክድመት ልትሃየብ ህለ። እት ሙስተሸፈ ማዕየ ማይ ዓይኒ ላኪን መሻክል መጸበሪ ዓመሲ ከምህለ እሎም ሐበረ። አዜ ልትነፍዑ እቡ ለህለው መጸበሪ ምስል ሐማይም ለለዋኡ ሰበትቱ እተ እማት መደረት ሕማም እግል ኢለኦምጽኦ ፈርሀቱ እት ሸርሕ ዲብ ሙስተቅበል እግል ልትሐሰብ እቲ ክም ወጅብ ኤተነ።

ከያማት ተዕሊም ምዴርየት ማይ-ዓይኒ 9 ረውዳት ህለዩ፡ 13 መእንብታይት፡ 2 ምግባይ ደረጀት ወ2 ምግባይ ወክልኣይ ደረጀት መዳርስ ህለ እሎም። ምህሮ እግል ዐባይ ህይ እት 9 ኣኅን ህለ። ክለን እዳራት ደዋሒ እምበል ሐቲ እብ ተማመን መዳርስ ህለ ዲበን። መዳርስ ለበዝሐ እብ ብኅ ለትበኅ እት ገብእ፡ ገሌ ላኪን ክም ዐዲ ሸጌ ዲብ ዕሸሸ ለልኣደርሶ ህለው ዲብ ሙስተቅብል እግል ልትሐለል ሰእየት ህሉት። ለዐበ መሻክሎም ላኪን ሕዲን ሙደርሲንቲ። እህትማም ደርስ ዲብ ተዕሊም ሑዳም ፈዳብያም እንዴ ሐደግክ ለበዝሐ ዲብ ሸቐል ሐርስ ወንዋይ ከምሰልሁሙ መ ዲብ ትጃረት እግል ልትፈረር ለሐዘ ሰበት ሳድፊ፡ እሊ እግል ልሲያሕ ህይ ዲብ እሊ ለሐፊ ወክድ ዲብ 14 እዳራት ደዋሒ ለጅነት ምን ክለን መኣሰሳት ሕኩሙት ለቁመት እንዴ ተሐረከት ታዕቢኣት ወሐብፊ ሃይቦት ዐለት።

መዋሰላት ናይ እለ ምዴርየት ካፊቱ እግል ልትበህል ኢቀድርኒ። እግልሚ ሰለሰ መዋሰላት ህለ እግልነ ደቅምሐሪ ኩዓተት፡ ደቅምሐሪ ሹብህ መዲነት ማይ-ዓደኒ ወከጥ ጸርነ



ማይ ዓይኒ

ምዕርየት ማይ-ዐይኒ እት ሄራር ሙስተቅበል

እንዲ ኬዲን ለልሐልፍ ሀብ፡ እሊመ ዲብ ሳምን ክልኢ ኣው ሰለሰ መረት ለልትገዮሱ። ከምሰልሁመ ጽርግዩ መሻክል ህለ ቀደም ሰለሰ ወኣርበዕ ሰነት ኣሳናይ ለገብኣ ዲባቱ ኣዚ እኢት ህሉት። እትሳላት ኣዚ ለሐይሰ ዲብ ገሌ ሳኪን ልሳዕ መሻክል ህለ።

እብ ሸዑብ ልትከደም ለህላ
አሸቃላት ህጹ አሰይድ ክፍሌ መንግስት
ገበይ ሰገይቲ አሳናይ ወዲነ ህሌ እብ
ኬዋ ዝያድ 2300 ለገብእ ቅወት
አዳም ለሸረክ እቲ። እምበላህ ናይ
ለከርበት ገበይ አሳንይ ወአሸረዓት
ወአክረት እት ምድር ሐርስ ለመስል
አሸቃላት ዲቡ ንትፈነር ህሌነ ልብል።

ቀይም የም ዓመት እት ምዲርየት ማይ-ዓይኒ ዝላም መልሐተይ ሰበት ዘልመት ንዋይ ሰዓር ረክበ ወአርድ ሰሩ ተሐረሰ። ሐቐህ ላኪን ዲብ ወሬሕ ሰቡዕ ዝላም ሰበት ኣትካረመት ክም ጣፍ ለመስል እክል እንዴ ተአከረ ትዘረአ ወዲብ ወሬሕ ሴዕ ሰበት በጥረት ምኑ ህዩ ሹብህ ሐዋን ህለ። ምስል ብዕድ ዶል ተትራእዩ ላኪን ሕነ ነሐይሰ ልብል አሰይድ ክፍሌ።



ከደማት ከርሀበት ክሉ ረአሱ ኢህለ። እት ምዴርየቶም እብ ገበደ ሰገነደቲ አስክ ተኸለ ለበጽሕ ከዋ ሕርጊገ እንዲኢኦን ብዕድ ከደማት ከርሀበት ኢህላ፤። ዲብ ምስተቅበለ ላኪን ምስል እለ ዲብ ደቅምሐረ እግል ልትሸቼ ልትበለ ለህለ ሰእየት ወዱ። ሽብህ መዲነት ማይ ዓደኒ አግደ መሻክለ እምበለ እምብሉ ለጸንሐነ ናይ እብ ተክጢዋ ለትደለ እግለ አርድቱ እለ አኬ ልህሌት ዲብ አርድ ሐርሰ ሰበትቱ ዲብ አየ እግል ትትበኔተ ልሳዕ ክም ስኣል ለህንጦዋል ለህላቲ።

እኑት አክሮ አሰይድ ክፍሌ መንግስት ምዴርየት ማይ-ዓይኒ ለህላ እለ ርዝቅ ብዙሐቱ እብ ሰብ መዋሰላት ላኪን አስከ ዐዳግ እግል ሊገሰ መሻክል ህላ እግል አርህዮት ሐል እግል ልግበእ እግሉ ክመስልሁመ ፈርያት ዲበ በዝሕ ዲቡ መክድ ለልትሐፈዝ እቱ መክዝን

ሰበት ለትሐዘ ደረሰም እሁኑም እግል ልትሆኑ ትፋኑ።

የናስ ብርሃኔ ናይ ዶሉ መስኡል
ፈሬዕ ወዛረት ሐርስ ማይ ዓይኒ እብ
ሰበት እት ምዴርየት ማይ ዓይኒ ለህለ
ነሻጣት ፈሬዕ ወዛረቱም ለከሰስ እት
ወዴሕ፡-

ፈሬዕ ወዛረት ሐርስ ምዴርየት ማይ-ዓይኒ ሰለሰ አፍረዓት ህለ እሉ፡ ፈሬዕ ርዝቅ ብቅል፡ ፈሬዕ ርዝቅ እንሱስ ወፈሬዕ ርዝቅ አርድ ከምሰልሁመ ዐቦት ነብረ ከምክም። 27 ነፈር ሰብ መቅደረት ህዬ ህለው እሉ። እትሊ ወክድ እሊ ዝያድ ከድሞ ዲቡ ለህለው ሐርስ ከረም ወጀራዲን ሐመሊት ወፍራታት እትገብእ እትላ ምዴርየት ዝላም ሰልፍ ዲብ መልሐተይ ሰበት ዘልመት ለበዝሐ ግሪህ ማቬለ ትዘረኡ፡ ሐቐሁ ዲብ ወሬሕ ጁን ወጁላይ ዝላም ሰበት በዋረት፡ ኣዘረኡት ማቬለ ተጠውር እግል ለርኤ ኢቀድራኒ። ከምሰልሁመ ዲብ ሃዘሞ ለልትዘራእ ጣፍ እግል ዝርኡት ለወክድ ጸቡ፡ እምበልሁ ዲብ ባኮት መረብ ገንሽረ ለልትበህል ባልዕ ሳደፈ እብሊ እግል

ልትረከብ ለዐለ እሱ እትይ ሐርስ ነቅሰ
እግል ልትባህል ቀድሮ። ባልዕ ገንሸረ
አጊድ እብ አጊድ እግል ልትከራዕ
ኢቅድረቱ እብ ደወ ሰበት ኢመይት።
እግል ልትኣራ ሌጡ፣ ለህለ እሱ እሊ
እግል ልግበእ ህዩ ሕነ ኣዋምር ሓለፍነ
ወአስክ እለ ልትኣራ ህለ።

ዓፍዩት ብቅል ወንዞይ እብ ኣውለውዮት ልትሸቄ ዲቡ፡ እብ ተርቲብ ዶል ልትርኤ ዓፍዩት ንዞይ እግሉ ክልዶል ፍድኢት ነሃይብ ወገኤ ሕማም ትረኣ ምንገብኣ ነኣክዱ ወኣስክ ለትወቀለት ጀረት ወሃረት ሐርሰ ሐብሬ ነኣልፍ ወእግል ሳሪዮቱ ለከሰሰ ተፋህም እንወዳ እብ ኣሳሰ እሊ ወለ ክቡድ ምን ሳድፈነ ክም ልትሳሬ ገብኢ። ብቅል ለከሰሰ ዲብ ኣዘረኣት ከምሰልሁመ ናይ ሐመሊት ወፍሬታት ለልትርኤ ሕማም ዶል ሳድፍ እንሳርዩ ምናተ ሕዲነ ደወ ህለ እግልኦ።

ምዲርየት ማይ-ዓይኔ ሐድ 8400
 ሄክታር ለልትሐርስ አርድ መልክ፣ እሊ
 ሆዬ ጣፍ፣ ዳጉስ ወማሺለ ከምስልሁመ
 ቀይሕ ዑተር ለመስል ልትዘራእ።
 ምን እሊ 1020 እብ መሰዋ ገምል
 ለህለ አርድቱ። እትሊ ናይ መሰዋ
 ለልትዘራእ፣ ለበዝሐ ኦራገሺ፣ ፓፓዮ፣
 ማንጉሱ፣ ወዘይቱን ከምስልሁመ
 ለበዝሐ ጀራዲን ለልኦፊርዮ ከመዶር
 (ጠማጥም)ቱ፣ ሐቅሁ ጎፅ በርበሬ ከም
 ሳልሳይ ደረጃት ለልትዘራእ ሆዬ በሰል



አሰይድ የኅሰ ብርሃኔ

ቱቤ፡ ለበዝሐው እብ አፍራድ ለሸቄ እት ገብአ ሑዳም በህለት 10% እብ መሕበር ለትከምከመው ቶም። እብ ፈሬፊ ወዛረት ሐርሰ ማይ-ዓዲኒ ህዬ ክል ሐቴተ እተ ባከ፡ ለህሌ ንቅጠት እደራት ሐርሰ እብ ሰብ መቅደረት ካሬ ሐብሬ ልትሆብ። ኣኬ እብ ፍንቱይ እንጨቅጥ እቱ ለህሌን ሸፍር ስፍዒ እንዴ ተርፈ ጠቢዓይ ሸፍር ኣልመዶቱ።

እትሉ ምዲርየት ሰለሰ መሕበር ህለው፡ መሕበር ሐመሊት ወፍሬታት፡ መሕበር መፍርየት ሐሊብ ወመሕበር መፍርየት ንህብ። እትሊ ወክድ እሊ ግሩም ገይሶ ለህለው መሕበር ሐመሊት ወፍሬታት ቶም። ምናተ ናይ መዋሰላት መሻክል ሰበት ህለ እሎም ወፍሬሆም ሕድ ለመሰል እተይ ሰበቱ ሽወየ እትሊ ወክድ እሊ ነቲጀቶም ክም በዲረ ኢህሌት። ናይ ሐሊብ መፍርየትመ እትሊ ወክድ እሊ ነሻባቶም ንቅስ ብሁል ህለ። እሊ መሻክል እሊ ምን ናይ እተይ ንቁሰ ወናይ ዓለፍ ንዋይ ኢወጀዶት ለመጽሐፍ። እግል ኦርዖቱ ህዬ ጅህድ ለትሐዝዬ። ናይ ንህብ ላኪን ግሩም ገይሶ ህለው።

ዐቦት ነብረ እትለ ምዴርየት እብ ፍንጽይ መገን ኣድሐነት እግል ኣትናያት ጀርቤ ገብእ ምሰለ ለህለ እለም ርገቅ ናይ ዕጨይ ላኪን ብዙሕ እህትማም ራክብ ኢህላኒ። እምበልሁ ናይ ዋዑም ድንሽ እግል ኣልመዶት ወእትኣታተዮት ክም በርናምጅ እንዴ ጸበጥናሁ እንሸፍ ዲቡ ህሌነ ብዕድ ታእሂላት ነብረ ዐቦት ለከሰሰ ላኪን እትለ ወክድ እለ ብዙሕ ለልትህየብ ኢህለ።

እት አክር አሰይድ የናሰ ብርሃኔ እት ምዴርየት ማይ-ዓይኒ 4 ኣካን ናይ ዝላም መቀየሲ ክም ህለ እሎም እለን ህይ፡ ዲብ እዳረት ደዋሒ ማይ-ዓይኒ 42 የም ዘልመ 489.9 ሚሊ መትር፡ ቅናፍኻ 13 የም ዘልመ 187 ሚሊ መትር፡ ቀላይ በዓቲት ናይ ዝላም 14 የም ዘልመ 222.6 ሚሊ መትር፡ ኩዓቲት 20 የም ዘልመ 462.3 ሚሊ መትር ዝላም ዘልመ እሊ ናይ የም ዓመት ልትርኤ እት ህለ ሹቡህ ድሁር ዐለ እማል ልትብህል ቀድር። ምስለ ሊከልፈ ዶል ልትርኤ እትለ ምዴርየት ቅያስ ዝላም ምን 800 ኣሰክ 520 ሚሊ መትር ቱ ለበጽሕ ሰኒ ለልትብህል ወክድ። ናይ የም ዓመት ላኪን ሹቡህ ድሁር ክም ዐለ ወደሐ። እብ ኣላሰ እሊ ቀይም የም ዓመት ገሌ ገሌ ናይ ማሼለ ኢሳረተ እተይ ድሁርቲ ለህለ እት ልብል ሐብሬሁ ሀሰኩ።

ሸባብ

ዶ/ር ዑመር ዑሰማን



መዳለይ እግል ኩልየት



ቀደምለ እግል ኩልየት እግል ንውደዩ ለብነ ሓጃት እንረኤ፡ አወል እብ ሰበት መድረሰት ካልኣይት ደረጃት እግል ንህደግ። እት መድረሰት ካልኣይት ደረጃት ለበዝሐ ወቅት እብ ዋልዴነ ምን ገብእ ወመደርሲነ ተውጂሃት ልትህየበኝ። ዮም ቂብክም፡ ዮም ሸቅል ቤት ኢሸቁክም፡ ፈጅር እምተሓን ብክም ሕፊዞ ወብዕድ እሉ መሰል ምክር ክል ምዕል እንረክብ። ላመ እሉ እንደርሰ አርእስ እሙር ወጽበጡመ ሕዱድ ቱ።

ከምን ክም እለ ለትመሰል ሓለት እት ክሉ ረኣሱ እት ነፍስከ ለተአተንክብ እት ሓያት ኩልየት፡ እብ ገአፎ ትጋብህ ወትትዐወት እት ምህም ቱ። እግልሚ፡ እት ኩልየት ወለአልፍ ዶል ዋልዴንክ ምን ረዩም ምንመ ራቅብኩ፡ ናይ ክል አምዕል በራምጅክ ኢደለ። ሰበት እለ ገበይ ሕፍዝኩ መትነፊያት ወቅትኩ መሳኒትከ ወብዕድ ኖሰካቱ ለትሐርዩ። ከምን እለ እንዴ አትሌነ ምህም ቀደም ክልየት እትየትነ እግል ነኣምረን ለብነ ሓጃት እግል ንሰሚ ቱ።

ሀ. እዳረት ነፍሰ
እት ኩልየት ነፍስከ ሓንቴ እዳረትካ ቱ። ግሩሽኩ ወቅትከ ወብዕድ ክሉ እት እዴክ ሰበት ቱ። ከአፎ ትትነፊዕ እቡ አመሮት ምህም ቱ። ለበዝሐው ደረሰ እት ኩልየት ዶል ለኣቱ እት ሰለኣስ ጅንስ እግል ልትከፈሉ ቀድሮ።

ለአወላደም፡ ምን መራቀብት ዋልዴኖም ሰበት ፈግረው፡ ሕርየት እት ትትሰመዶም ወእብ ሽዑሮም ልትሐረኮ ቶም። እሎም አንፋር እሎም እግልሚ ማጽኣም ህለው፡ መግጽሖም ሚ ቱ። ሽዑሮም ወሕኩመቶም ምኖም ሚ ክም ልትጸበሮ ለኢልትፈሀሞም፡ እት ህጅክ፡ መትፋግዖት፡ ምስገዮት ወብዕድ ወቅቶም ለለሓልፎ፡ ግሩሾም ወወቅቶም ለበዝሮ እት ገበኤ፡ እት ድራሰቶመ ለበዝሐ ወቅት ኢልትዐውቶ።

ለካልኣደም፡ ወቅቶም እብ ዋጅብ ለልትነፊያ፡ ዋልዴኖም ወምደርሲኖም ለለህዩሮም ተ ምክር ለሰመዖ ቶም። እሎም አንፋር እሎም ለተርፎም ሓጀት ምን ተህሌ፡ አግቡይ ሕፍዝ ወፍድብነ ለለሐብሮም ሰበት ልሰእኖ፡ እት ሓንቴ ጨቅት እት እንቶም ድራሰቶም ክልሶ።

እሎም ጅንስ ደረሰ እሎም እግል ልውደወ ለሶም ህዩ፡ እግለ ቀደሚሆም ምን ኩልየት

ለትደሕረው አንፋር እንዴ ረክበው ወምን እንተርኔት ምን ገብእ ወብዕድ አክትብት ወመጀላት ኩልየት ለክሰስ ሐብሬ ወተውዕያት እግል ልሕዘው ወጅሶም። ሰበቡ፡ ጃምዐት ሰበት ኣቱክ ሌጠ ክሉ ተመ በህለት ኢኮን፡ ዲበ ኩልየትመ ሐዲስ አግቡይ መትነፊያት ወቅት ወሕፍዝ እግል ትፈትሽ ወቅድረትከ ትጠውር ለኣትሐዜ።

ለሳልሳደም፡ አግቡይ መትነፊያት ወቅት ለለአምሮ፡ እብ ሰበት ድራሰት ወመናበረት ኩልየት ካፍየት ሐብሬ ለሶም፡ ምክር ዋልዴኖም ወምደርሲኖም ለሰመዖ፡ ላሊ ወአምዕል ለህቡቶም ለልክዑ ወእት ኣክር እንዴ ተዐወተው ለፈግሮ ቶም።

ለ. ኤታን ወቅት
ኤታን ውድየት ወወቅትከ እብ ዋጅብ አመቅርሖት እት ድራሰት ሌጠ እንዴ ኢገብኤ፡ እት ክል መጃል፡ ሸቅል፡ ዕምር ወሐያት ምህም ቱ። እት ካልኣይት ደረጃት ምህሮ ብዞሕ እንዴ ኢነሐፍዝ አው ክም ምራድነ ወእት ለትወጠ እነ ወቅት እት ነሐፍዝ ሰኒ ፍገሪት እግል ነኣምጽእ እንቀድር። እት ኩልየት ላኪን፡ “ለበዝሐ ለከድመ ወለህበ ልትዐወት” ሌጣ ተ ለመርበይ። ሰበት እለ ላዝም ክል ምዕል፡ ክልኤ-ሰለሰ ወጅበት፡ ምን ሳዐት አሰክ ሰለሰ ሳዐት ለሪመን አውቃት ሕፍዝ እግል ለህልየ እግልነ ወጅብ።

ክእነ እግል ቲዴ ህዩ እት መድረሰት ካልኣይት ደረጃት እብ በርናምጅ ወኤታን ገዩስ እግል ትትላመድ ለአሰትህል። በርናምጅ እንዴ አፍገርከ እቡ እግል ቲጊስ ቀዲር፡ ትሩድ ቱ ወምን አጅል ስታትከ ዐውል እግል ትድፈዕ ዱሉይ እግል ትግባእ ብከ።

በርናምጅ አፍገርት ቀሊል ቱ፡ ክሰሰን ወለ ሐድ ሽዑር ዶል ለህሌ እከ። እበ አፍገርካሁ ኤታን እግል ቲጊስ ላኪን ሐጠር ወመትሰባል ለኣትሐዜ። እግል መሰል እት ምግብ ህጅክ፡ እግለ ጀማዐትኩ “ኣነ ሳዐት ሕፍዝዬ ተመት እግል ኢጊስ ቱ። ” መልህደምከ አረሕ ሻሂ ንሱቴ ወንትፋገዕ እት ልብሉክ እግል ሕፈዝቱ ብሂል እብ አማን ሐጠር ወበታከት ለኣትሐዜ።

ሐ. ምራድክ አመሮት ወጨቅዋ አብደዮት ክል-ዶል ሸንህትከ

ወለልዋዕመከ ወቅት ሕፍዝ ኢተአምር አውመ እግል ጨቅዋ ወሸቀላት እብ ከአፎ ትጋብህም ኢተአምር ገኣከ ምን ገብኤ፡ እት ድራሰት ኩልየት ኢኮን፡ እት አምዕላይ ሐያትካመ ደረሮም ዐቢ ቱ። ጨቅዋ እብ ፍንቱይ ክል ምዕል ወሳዕት እት ህምገም ክም ነብር እንዴ ወዴከ፡ እግለ ናይ ካድም ቅድረትከ እት ባሕ ቀይረ። እት ኩልየት ህዩ ምን ዓኢለትከ ትትፈንቴ ሰበት ህሌኩ ሐድ ሸቀላት እግል ለህሌ እከ ላዝም ቱ። ክምሰልሁመ ምን ገብኤ፡ እት ኩልየት ምህም ዕልም እግል ትክሰብ ማጽእ ክም ህሌኩ ምሰልክ ለህለው አንፋርመ ክምሰልክ ክም ቶም፡ ወእድንዩ አክል አዩ ረሓብ ክምተ እግል ትርኤ ቀደርከ ምን ገብእ ሸቀላትኩ ልትጃቀቅ ምንከ።

እት እድንዩ ወሐያት እብ ዕሙማይ፡ ለሁብ፡ ተዐብ፡ ለተህየቤክ አማውር ወካድም አትምም፡ ወሐቆህ ለተርፈት እትከ ኢኮን። ክእኒ ውድየት ምን ትዕስ ለኣድሕን ወለበዝሐ ወቅት እት ዐውቱ ለአበጼዕ። አልሄ ክእኒ ዋዲ ወገብኣኩ፡ ግምሽ ምሰል ከረ ፍላን ግስኩ፡ ፍላን ሰኡል ወምኑ ሐብሬ ናሰእ ምን እገብእ ወተዐወትቲ! ምን ሰኩብዬ ቅሩብ ሳዖታት እንዴ አንቀሰኩ ለኢትፈሀመውኒ መጃላት እግል እቅረእ ወእፍህም ዐለ እዩ! ወብዕድ ለልብሎ ሓጃት ራሐት ደሚር ክም ኢተህሌ እልነ ወዱ። ከክል ዶል እግል ትዕስ ንኢሸመ ትግባእ ባብ ወበክት እግል ንሕደግ አለብኝ።

ፈ. ስታት አዳሌ
ናይ ሰነት፡ ሰር ሰነት አው ርሶዕ ሰነት፡ ሸሀር፡ ሳምን ወምዕል እንዴ ካፈልኩ፡ ኤታንክ አትዳሌ። ኤታን ሌጠ እንዴ ኢገብኤ፡ እት መከልሲ ክል ክፋል ወቅት ሚ መባጼዕ እግል ትብጸሕ ወትርከብ ተሐዜ ህሌክ ሕሰብ፡ ወትብጸሐ ሚ ኢፋሉ ፈትሽ። ክም እለ አግቡይ መትነፊያት፡ ዶል ሸክፍ

ምን ቅሩብ እግል ተዐቅብል ነፈዐከ። “ምን ቅሩብ ወድቀ ምን ጸሌዕ ነግፈ” ለመሰላ ቱ።

• እት ክል ሳዐት ወአምዕል ሚ እግል ትውዴ ብከ፡ በርናምጅክ ሚ ዐለ ወብዕድ እግል ነፍስከ ትሰኣል ወአትፋቅድ።

• ክል ምዕል ሰኒ ካድም ወፍሬ/ሕፍዝ/ንቃዋ እግል ለህሌ እከ ወትርከብ ገኣከ ምን ገበእ ላዝም ሸቅል ሌጠ እንዴ ኢገብኤ እብ ዋጅብ እግል ተግርፍ ወትሰኩብ ብከ። ክምለ ወቅት ሕፍዝክ ግምሽ እግል ተአብድዩ ለአለብኩ፡ ወቅት ዕርፍካመ እብ ግምሽ እግል ልብዴ አለብ። ዮም ላሊ ሰኒ ኢዓረፍክ ወኢሰከብክ ምን ገብኤ፡ ፈጅር እት ፈሰል ምን ገብእ ወሕፍዝ ሰኒ እግል ተአግዴ ኢትቀድር።

• እት በርናምጃትከ እመን ወኢለአሸቁክ መሰለው እትከ ምን ገብእ ኖስከ ቀይሮም። እምበል በርናምጅ መሳኒትከ እብ ረኤክ ኢትፍረህ ወፍክርክ ኢትቀይር።

• መትነፊያት ወቅት ለክሰስ አክትብት ወእንተርኔት ፈትሽ ወናይ ኤታን አፍገርት ቅድረትከ ዓቤ።

• እት ኩልየት ናይ ሐቱ ሳዐት መደርሰ ለለአደርሰናቱ አርእስ እግል ንፍሀሙ ወንሕፈዙ ሰለሰ ሳዐት ወምለዕሉ እግል ልንሳእ ምኒን ቀድር።

• ክም መኣንበቲ እብ ሸሬሕ (ሌክቸር) አው ውራቅ ሕፍዝክ እቡ አንብት ወሐቆሁ እት አክትብት እንዴ ጊስክ አፍይሐ። ሐቆ እለ ወቅት ረከብክ ምን ገብእ ምሰል ጅማዐት እንዴ ገኣከ ድገሙ።

• ክል-ዶል እግል ትሩድ ካድም ዱሉይ ግበእ ወእብ ቀሊል ኢትትሐለል። ብዞሕ ሸሬሕ ለለኣትሐዝዩ ሰኣላት

እት ድራሰት ወእብ ፍንቱይ ኩልየት ረዩም በሊስ ለለሐዝዩ አሰኣለት ላዝም ቱ ለንትህዩብ፡ ከእግል ዮም እብ ከአፎ በሰር

ምን እንበልሶም እግል ንትዐወት እንቀድር ለክሰስ ንቃዋ እግል ንርኤ ቱ።

□ ምደርሰ እት ሸሬሕ ለጨቅት እቶም ንቃዋ፡ ምህም እንዴ ገብኦ ለትረኤነ ሰወር፡ ሰቡራት፡ ዕሎታት፡ እት ክታብነ እብ ዳምቅ ለትከተብ ከሊማት ነኣንተብህ እሎም፡ እግል ሚ፡ ሰኒ ምህመት ሰበት ሶም ወእግል ነኣንተብህ እሎም እንዴ ትብህላ ቱ ክምሰልሁ ለገብኤ።

□ ሚ አሰኣለት እግል ልምጸኣነ ቀድር እንዴ ሐሰብነ ነፍሰነ ንትሰኣል። ለበዝሐ ወቅት ምደርሰ ለእት ፈሰል ጨቅት እቱ ንቃዋ እት እምተሓን ለአመጽኡ። ሰበት እለ ዮም ለደረሰናሁ ደርሰ ዮም ሐፈዝክ ምን ገብኤ፡ እግል ፈጅር ለህለ እምተሓን ሳዕደነ። ቀደም ለገኦ ሰኣል እንበልሰ፡ እግል ሰኣል ክልኤ ዶል እግል ንቅርኡ ብኩ፡ ወእብ ጽበጡ ትፈሀሚነ መኢፋሉ ነኣንተብህ።

□ ለሰኣል እግል ንብለሰ ለሳዕዱነ ፍክርያት፡ ሸሬሕ አምዕሎታት፡ አሰማይ ወሰወር ነኣክብ።

□ እብ ከአፎ መከምከሚ ምን እንወዴ ንፈክር። ሐቆሁ እግል ሐዩብናህ ሐብሬ እት ናይ በሊስ ወረቀትነ ንክተብ።

□ ሐቆ እለ በሊሰነ ራቴዕ ክም ህለ እግል ንሰዩሕ ወቅት ሐቆ ብነ ምን ጀዲድ ንቅርኡ።

□ ኦሮ ሰኣል እንዴ በለሰነ እት ብዕድ ንትዐዴ እት ህሌኩ አካን ንሕደግ፡ የምክን ሐር ተውሳክ እግል ንርከብ ሰበት እንቀድር።

□ ሐቆ እለ ክሉ ለትህየቤነ አሰኣለት እብ ግሩም ክም በለሰናሁ ነኣክድ ወለኢበሰና እቱ ሰኣል ኢንሕደግ።

□ ናይ እምተሓን ውራቅነ ክም ተህየቤኩ እብ ዋጅብ ተሰዩሕ ንውዴ ወከለዋ ሐቆ ብነ ንሰዩሐ። ሰበት እለ፡ ክል-ዶል ሐቆ እምተሓን ትሰዩሕ ንወዴ።

ለምድር ጸብሐ ወጸሓይ እበ ምፍጋረ ሽብብ ትቤ፤ ለሚርሓይ ደደፍ እተ ምግብለ መዐስከርለ ጃሽ ለበረ ምነ ክሌብ መዲነት ምነፍ ዐሉ፤ እተ ቴንጀት እንዴ ትገሰ፤ ከሪጠት ተምሳል ጀዘረት ሲናይ ወለ ከሌበ ለዐቢ ወለአግቡይ ለባዶብ እንዴ ተዐዴት አስከ ተአበጽሕ እለን ልትፋከር ዐለ። ላመ መዐስከር ዲብ አሕድ ፍልክ ልብል ዐለ። ለአፍሩስ ለሐማሕም ወለ ዐጀላት ሐጨልጨል ልብል ወለ ጅኑድ ኬን ወእንሰር ልብሎ ወእተ ነፍስ ትፈትየ ሐፋነትለ ጸሓይለ አሰቦሕ እተ ልትማቅኦ ዐለው።

ለዛብጥ ሰንፍሮ ዲብለ ሚርሓይ እንዴ አተ ከእብ እሕትራም ሰላም ክም ቤለዩ ክም እለ ቤሉ፦

- ምነ በዐለ ውቅልት ሕሽመት አሚር ረዕፍ ልኡክ ማጽእ ሀሌ። ወምስል ሕሽመትክ እግል ልትዋጀህ ሰመሕ ጠልብ ሀሌ።

ደድፍ ክም እዩስ እት መስል ክም እለ ቤለዩ፦

- ልእቲ ሐደጉ፤

ሰንፍሮ እግል መደቲት እንዴ ጸንሐ፤ ለጋሽ እት መሬሕ መጽእ ወሐር እበ አሰሩ ምነ ቴንጀት ፈግረ። ለልኡክ ለበብስ ካህን ላብስ ዐለ። ለልባስ ምነ ፈወቂቱ አሰክለ ሽካሂሁ ግልቡቡ ዐለ። ወእተ ረአሱ ጣግዩት ጸላም ዋዲ ዐለ። ወለ ሽከሙ ምን ክትር ሪም እተ ረአሰለ ነሐሩ ግፍቱእ ዐለ። ደደፍ እሊ ነፈር እሊ ክም ረአ ሰኒ ተዐጀቡ። ህቱ ነፈር ሰኒ ለአ'ምሩ ምነ ዲብለ ሮሻንለ ዌርሳይ ዐራት ክልዶል ልትዋጀሆም ለዐል አንፋር እግል ልርኤ ልታኬ ዐለ - ክርን ሰምዐ። ምናተ ለክርንዲ ወለ ሕፍሱት መ ምን ተዐሌ ቀደም እላመ ሳምዐ ክም ዐለ ሸክ ኢወደ - ክም እለ ቤለዩ፦

- በዐል ሕሽመት፤ ጋር ሰኒ ሙህም እቡ ማጽእከ ህሌት። ሕርበትለ ባብለ ቴንጀት እግል ትክረዩ ወእምበል እጃዘት ነፈር አሰክለ ቴንጀት እግል ኢልቅረብ አዋምር ምን ተሀይብ ወፈቲ።

ደደፍ እግል ልኡክ ተማም ትፋጠነዩ ወሽውየ ሸክ ወደ። ምናተ እብ ዐደም እህትማም ለረሓይብ ፈወቂቱ ነክነከ። ከእግል ሰንፍሮ እንዴ ትላከ። ሕርበትለ ባብ ተሐት እግል ልክረዩ ወነፈር እግል ኢለአቅረብ ዲበ አሰአለዩ። ሰንፍሮ ለአዋምር ወደዩ። አሕድ ክም በሐተው ደደፍ አሰክለ ልኡክ እንዴ አቅመተ ከክም እለ ቤለዩ፦

- ከግድም ከበር ሀበከ።

ለልኡክ ለቴንጀት እብ በይኖም ብሕታመ ክም ህለው ተማም ክም አከደ። ለጣግዩት ጸላም ምነ ረአሱ ሀረሰዩ። ድርድመትለ ጭገር ሻምለ ጸሊም ለእተ ሐንለ ጣግዩት ድርቡብ ዐለ ገጽ ተሐት እተ ረአሰለ መናክቡ ገብ

ተመህ ቀደር



ቤለ። ሐቀ እለ ለልኡክ ለእዳኩ አሰክለ ሽከሙ እንዴ ነድአዩ እብ ምልሃሁ ውርኪ አበለዩ። ላመ ክልኤ ዕንቴታቱ ለእት ለአምር እትጨለቀን ዐለ በል አተበለዩን። እለ ኢኮን ለገጽ ኖራይ ምስለ ፍግረተ ጸሓይ እግል ቴንጀት ሰኒ ወአማን በርሀት ከድነዩ፤

ደደፍ ለልቡ ምነ ክርሲሁ ትሸልሀተ። ወእብ ክርን ቡትክት፦

- መንባይትዬ መሪ ሲ ዐንኽ!

ክመ ሰፊረት ልድንግጥት እት መስል አሰከ ሃፈተ። ወእተ ሐንለ እግረ እንዴ ትገሰ ለልባስ እሉ ሰዐመ፤ ለአሚረት እብ ክጅል ልበ ዳውል እት እንቱ ገጸ ቀደም ተአትቃምት ዐለት። ወክለ ትንፋሰለ መንደላይ ምነ ሐረሰለ ልባስ እተ እገረ ሽዐረት እቡተ ከለገሮበ ለአሸዐልል ዐለ .. ሐር እበ አጩብምተ እተ ረአሱ እንዴ ተምተመቱ ከእብ ክርን ድህር እት ተሐሽክሸክ፦ “ክብ በል” ቲሉቲ፤ ለመንደላይ ዕንታቱ እብ ፈርሐት ባርሃት እት እንተን ወቀደም እለ ርእያቱ ለኢለአምረ ኖር ክዱናት እት እንተን ብጣሩ እንዴ ገበአ ከክም እለ ቤሉ፦

- መንባይትዬ እለ አማንተ መእትሐለም ህለኢት? እሊ እሉ እርኤ። ወእሰምዕ ህሌኩ ክሉ አማንቱ?

እዴህ ክም ሀበት ለተአሰእል እቅማተት አቅመተተቲ። “ለእለ እወዴ ሰበት ትቀዌት እቴቱ ማጽኢትክ ልህሌኮ” ትብል ልህሌት ትመስል ዐለት። ለመንደላይ ህዩ ክም እለ ቤሉ፦

- እለ አዜ። አልሀት ለውቀት ክሎም ምስል እተ ልብዬ እንዴ ትጀመዐው ሕላይ ፈረሕ ወሰሩር ውቁላም ህለው። ወእሊ ሐልዩቶም ለእሉ ሓለፍኮ አውረሐት ዐዛብ ወትርሃንለ ላሊ ኩሉ አትረሰዕወኒ። ላመ አክራናቶም ጥዑም እግለ ልብዬ ምነ ጠምጠም ዐንደል ወዋልመት ላሊ ጋብእ እትዬ ለዐለ በቲክ ሰእዩት ዲብ ኖር ወበርሀት አፍገሬኒ! ማሊ እዲነ ምን ምፍራቅ ሾመት ጫብት እትዬ ክም ዐለት ምን ለአምን?! ለህግያሁ ዲብ ሰ'ምዕ ለገጸ ሰኒ

ክም ተአሰፈት መሰለት ወእብ ክሬነት ድህር ክም እለ ትቤ፦

- ለእዲነ እብ አማን ጩብት እትከ?

ለክልኤ ዕንቱ እግለ ከኔፍራት ለከሊማት ልትፈፈ። ምንን ዐለ እት ለአቀምተ ክም እለ ቤሉ፦

- ሰኒ ጩብት እትዬ። ወእብ አማን ሞት ሌጠ ተምኒ። ሞት ህዩ ሰእዩት ለበትከ ሌጠ ልተምነዩ። ከመንባይትዬ አነ ፈረህ ይእምስል እትኪ ምነ ዋጅብዬ ላተ ሐር ኢሐመጣመጥኩ። ምናተ ለሀደፍዬ ተርጀመት ለአለቡ ወላመ እለ እወዴ ኩለ እምበል ጋር ወስልሐት እንዴ ገበአት ትትሰምዐኒ ሰበት ዐለት ሰኒ እት ዐዘብ ዐለኮ፤

በይን እተ ነሐርዬ እንዴ በርከት እግልዬ ለዕንታትዬ እብ ጥልመት ዳፈነቱ ምንዩ፤

ምን ኩለ ረሐ እንዴ አተንፈሰት ክም እለ ትቤ፦

- አነ ህዩ ለኮርዬ እተ ቀሐትለ ክብርዬ እንዴ አጥፈሕኮሁ ክምኑ እግል ይእትከሬ ርሕዬ ዲብ እማንዕ ወአትሓሌ ዐዛብ አልዌል ወክርበት ለምንኬነን አለቡ ረኤኮ፤

- ረሕመት አለብኪ እለ እንቲ ዐደድ እለ ተዐ'ዝበኒ፤

- ላመ ርሕዬዲ ሰ'ኔት እተ ይዐልኩ። እተ ግንራራብለ ኒል ለአምዕል ትፈቅደ ማሚ። ለአምዕል ለሀ ልብዬ እኩይ እት ወዴኒ ወሰኒ ሹቅልት እት አነ ዒርኮ። ወሐር ለአመርኮሁ ጋር ህዩ። ልብዬ ዲብ ክርንክ እግል ልፍዘዕ ክም ተከተበት ዲቡ ትየቀንኩ። ወእለ አማን እለ ህዩ። ፈርሀት ለምነ ኢትደለ መዋድቅ ትመጸአነ ወለዘትለ መኻጠረት እለን እት ትአትሓወለኒ ረከብኮህ። ሐር ላኪን ለምኬሐከ ወለ እብ ነፍሰከ ትወድዩ ለዐልከ ፋሻት ሰበት ፈቀድኮ ሐረቅኮ ወእብ እማ'መት እት ዓክሰ ጌሰኩ። ወዶልከ ረኤኮከ ምን ገብእ ዐዛብ እት ርሕዬ ወእትከ እገብእ ዐልኮ፤

ምን ኩለ ርሐ እንዴ አተንፈሰ እብ ህግዩ እሰፍት ክም እለ ቤሉ፦

- እለ ምኬሐዬ አክል አዩ

ዐዘበ'ተኒ! እግል ካልእ ዶልነ ዲበ ሮሳንለ በዐለ ውቅልት ሕሽመት ለትሬኤናህ ህዩ ትፈቂደ ማሚ? ነሃራት ወዴኪ ዲብዬ ወእምበል ረሕመት ሀደድኪኒ። ወማሌ ወላ ከበርዬመ ይአምጸኢ ወሐቱ ደዐቲት ናይ ሰርሓመ ትግበእ ከለኢኪኒ። ከአክል አዩ ክም

ተዐዘብኩ ወመጠጥኩ ዳልልዩት ዐልኪ? ሙስተሐሊ'ተ .. ያሬት ኖሱ ምንኬን ቂብ ለህሌት ሰንዐት እግል እድሌ ሐለት ምን ተዐሌ እግልዬ! እለን እሱፍ እት አነ ለሓለፍኮህን እዋናት ዝያድ ኩሉ እግል እትለወቅ እተን ለወጅብን ዐለዩ፤ ለዐዛብዬ ዲብ አልሀት እሸኬ እቡ ዐልኮ ወሀተን ህዩ እተ ኢአመርዬ ወለ ጀሀልዬ ልትሰሐቀ እትዬ ዐለዩ!

ተበሰም እንዴ ወዴት ክም እለ ትቤ፦

- አናመ ለአልሀት ለክብርዬ ትርእዩ ሰበት ዐለት ዲብለ ሕምቅናዬ ትትሰሐቅ እትዬ ሌጠ ዐለት። ከቀደም እለ ክም እለ ናይነ ለመስል በደ ወቅዌት ርኤ እንተ?

- ከእግል ሚ እብ ርሕነ ንተልሂ ህሌ። አነ እሊ ለሐር ኢለአቅብል ወበላሽ እብዱያሙ ለህሌነ ወቅትነ ክለ ፈቀድኩተ! ከሰኒ እሱፍ ወሕዩር እት እንቱ አተንፈሰ። ህተ ህዩ ክም እለ ትቤ፦

ልባብ

ሰበር ዕዉር ልቡ ትከሬዕ

ዎሮት እናስ ቀማይሽ እንዴ ሸቀ እት ሰብ ጅላብ ጃንጥላት ለአዘብዩ ክም ዐለ ልትደገም። ሐቲ ሰነት ለቀማይሹ ለሰነት እብ ግዲደ እት አዳልዮቱ ካልእ ዐለ እንዴ ረፍዐ እግል ለአዝብዩ እትለ ሰብለ ጅላብ ዶል ጌሰ እቡ። ዎሮት ታጅር እንዴ በድረዩ እተ ሰብለ ጅላብ ዐደድ ክፋዩቶም ቀማይሽ እንዴ አዝበ እቶም ጸንሐዩ።

ለእናስ እሊ ጋር እሊ ክም ተሃደፈዩ ሰድመት ትርድት ገብአት እቲ። ረአሰ ማሉ በደ ወተጃረቱ ሰአኑ ለቀማይሹ እትለ ቀደሚሁ እንዴ ከረዩ ትገሰ ወእግል ልሕሰብ አንበተ። እብለ ግሳዩቱ ምክሔ ሰብለ ጅላብ ሰበት ገብአ። ዎሮቶም እት ልተርጀክ እቲ። “ሰረውን እንዴ ሸቂካሁ ከልበሱ” ቤለዩ። ለእናስ ምን እለ ህግዩ እለ እንዴ ትበገሰ ብዘሕ ሐሰበ ወአስተንተኑ ወእብ አማን ምንለ አቅምሸት ለሀ እግለ ሰብለ ጅላብ ለገብእ ሰራዊን ሸቀ ወእብ ዐውል ረኪስ አዝበዩ እቶም። ወክም እለ እት ልብል አትዓለለዮም እበን። “ምን ሀለ ምን ቅማሽ ትሩድ ምስል እለ ቃሰዩት ጠቢዐትለ ሸቅልኩም ለገደሰ ሰረውን ለልትዛቤ”?

ለአዳም ለሰረውን ሰኒ ሰበት ዐጅብዩ እግል ዝቤሁ ትባደረው እቲ። ለእናስ እትለ ትመጽእ ሰነት ብዘሕ እግል ልሸቂ ምኑ እሎም ክምቱ ገለድ አተ እሎም ወሰረውኑ እንዴ አዝበ ትወክለ። ሰነት ሓሪት ተማም አትጋረመዩ ወምስል ጠቢዐትለ ሸቃለ ለገደሰ ብዘሕ አጅያብ ወደ እቲ። ወክል ዶል ክምስልሁ እት ወዴ ወእትለ ሰብለ ጅላብ እት ገደሰ ወሀቶም እት ልትባደሮ ዲቡ። ለእናስ እብለ ገበይ ለምሽክለቲ ዲብ ዐባይ ዐውቲ በደለዩ።

ምሽክለት እግል አደሚ እተ እለ ሀለ ክም በጥር ትወድዩ..ምናተ ተጃውብከ ወለ ነህይቡ ርዱድ አፍዓል ቱ ለገጽ ቀደም ክም ነአሴርር አውመ ገጽ ሐር ክም ነአቀብል ለወዴኔ።

ተበሰም

• ዎሮት ግሉል ተለፎን አሰክ ሸሪክትለ እትሳላት ወደ። ምወዘፍለ ሸሪክት እንዴ ትከበተዩ፤ “መርሐባቡ ሚ እሰዴክ” ቤለዩ። ህቱ ህዩ፤ “እሊ ምስልዬ ለሀለ ሐብል ተለፎን ሰኒ ፊመ እትዬ። እተ ጎርከ ዲብ እንተ ሸውየ እግል ትሰሐብ ምኑ ትቀድር ማሚ?” ቤለዩ ልትበሀል።



መዳግማይ መ/አድራሽ

የም 27 ኦክቶበር 2023 ጽብሕ ምድር ቱ ለዐለ። ምን አስመረ ከረን ወሰነይ ለመጽሐው አንፋር ጀማሂር ሳሕል ለዐለው። አስክለ ንትጀመፅ እተ ለትብህልነ ባካት መድረስት ቀይሕ በሕሪ ትከምከምኑ። እሊ ግውሐ እሊ ህይ። እግል መትዳዋር ዲብ ከርስ አስመረ እንዴ ኢጉብእ። አስክለ እት መሳፈት ዝያድ 300 ኪሎሜተር ለህለ አምዳር ቅብለት ኤረትርየ ለአመመ ሰበት ዐለ። ክልነ እብ እህትማም ዱሉያም እግሉ ለዐልነ ሰፈርቱ። ለ18 ነፈር እንጉብእ አንፋር ጀማሂር ሳሕል ለዐለው። ክምሰልሁመ ምን ውዛረት እዕላም አርበዕ ነፈር ወምሮ ምን መፈወደየት ዓድት ወርያደት ዐልኑ። ምን አፌት መድረስት ቀይሕ ባሕሪ ዲብ ሰለሰ ነኣይሽ መካይን እንዴ ትጸዐንነ ህይ። መጣር ዐስከሪ አስመረ ጠበሽ ክም እምቤ ለሰፈር እብ ምድር እንዴ ኢጉብእ እብ ዐስተር ክምሰቱ ሸክ ኢወዴኑ። ዲብ መጣር ለወጅሁነ አንፋር ቅዋት ጀው ኤረትርየ እብ ገጽ ፋሬሕ እንዴ ትከበተው አስማይነ ክም ነድሀው። አስክለ ዱሊት እግልነ ለዐለት በርዐድ ሄሊኮፕተር መርሐውኑ። ዲብ ከርስ ዋያረት መጋሲትነ ክምሰል ጸበጥኑ አክል ሕድ ሳዓት 7:30 ምን መጣር ዐስከሪ ዋያረትነ እት ሰመ ያለት እብኑ። ሀደፍ ሰፈርነ ህይ አስክለ መንዝል ስሙድ ወኤማኑ መንዝል ሐጠር ወፈራሰት። ምድር ሕራበት ወምሕርበት ላቱ ቅብለት ሳሕል ለአመማቱ ለዐለ።

እት መደት እስትዕማር አቶብዩ ምን አስመረ ለልትበገሰ ሄሊኮፕተራት ውበዕድ ዋያራት። ጽዋር ደማር እንዴ ትሆገለየ ሳሕል ጋድሞታቱ ወአድብሩ እግል ልቅለየ ልትሼቢያሁ ምንመ ዐለየ። የም ላኪን ኢከም ማሌ። ሕርየት ክም ስሜተ ሕርየት ሰበት ጉብኣት። እብ ፈድል ሕርየት ህይ ሰላም ወመስኩበት ሰበት ትመደደት። እሊ ሰፈር እሊ ዎር ምነ እግል ወቀይ ወዝያረት ናይለ መሳክብ ለህይ ወሽዐቡ ለአመመ ዐለ። እነ ቅብለት ሳሕል እግል ሰልፍ መረት እብ ሄሊኮፕተር ቀደም ሴዕ ሰነት እብ መናሰቡት። “ሳሕል ክምሰል ደውለት ወጀብህት ሽዕብየት ክምሰል ሕኩመት” እበ ልብል ሽዓር ለትዘከረት ፊቃዶ 30 ሰነት መትደውሻሽ ናይለ እግል መደት ሐምስ ሰነት ዲብ ቅብለት ሳሕል ሻፍፍ ለዐለ ጃሽ ደርግ ለክሰሰ በራምጅ እዕላም እግል አዳሌ። ምሰል መልሂቹ ሱፋር እበ ምንመ ዐልኩ። እሊ ናይ የም ሰፈር ላኪን ምነ ቀዳም ሰፈርዬ ለትፈንተ ዐለ። ምን አስመረ አስክ ቅብለት ሳሕል ወእብ ፍንቱይ መዲነት እምሀሚሚ ነዐውል እት ህሌኑ ለምሰልዬ ብጉሳም ለዐለው አንፋር ጀማሂር ሳሕል። ለበዝሐው ምኖም ምን ሰር ሰብዓታት ወሐር ጀላብ ወጠን ወሽዐቡ ምን ከበሰ ውበዕድ ድዋራት ኤረትርየ እንዴ ትበገሰው

ርሐም ጀላብ ሕርየት ወእስትቅላል እግል ልትቤዙ ምን አስመረ እብ መካይን ወዋያራት እንዴ ኢጉብእ። እብ እገር ወሕቦዬ ምን ዕን አባይ። “ዐውቱ አው ሞት!” እንዴ ቤለውቶም አስክ ሳሕል ልትደረው ለዐለው። ዲብ ሳሕል ለትሰሐለው። ዲብ ለዐበው ወለናደለው ወክሉ ዕምር ሽቡቶም ዲብ ለአትመመው ጥዕም ወመራር ዲብ ሳሕል ለጠምጠመው ምሕርበትቶም ለዐለው። እብሊቱ ህይ። ክል ምኖም ዲብ ናይ ኖሱ ዝክርያት ሰፈላል ወስርቤብ እግል ልትሸመም ጠቢዒ ለዐለ።

ለሄሊኮፕተር ምን መጣር አስመረ እንዴ ቀንጸት። እብ መሸንገል አስመረ ተዐውል እብነ ዲብ ህሌት ዕንታትነ ምን አስመረ እንዴ አስተብደ እበ ዲብ ባካትነ ለዐለ ሸባቢክ አስክ ምድር ዲብ ለአቀምት ህይ። እግለ እብ ሸዒር ወሸንራይ ለትገልበበ ሸግራይ ጋድሞታት ከበሰ እንዴ ወሐኑ አስክ ሰመ ለለንቀዕርር አድብር ሰሚናዊ ባሕሪ ወምድር መንሰዕ እንዴ ኢልትአመረነ በጽሐናሁ። ዕንታትነ ክምሰል ሀየቢ ሰመ ገጽ ተሐት ዲብ ለአቀምት ወነዐፌ ወእበ መካሪተ ምድር ዲብ እንዳግም ወእብ ሞባይላትነ ዲብ እንሰውር ህይ። ለሰፈር ዝያደት ጀላል ዐለ እቱ። ለዲብ ነገር ደሐን ምተሐት እንዴ አንቀዕናረርነ አስክ ርሸመቱ ነአቅምት ለዐልነ ወቁል ወታኪ አድብር ህይ። የም እብ ፈድል ቱክኖሎጂ ምለዐሉ እንዴ ዱርነ ነሐልፋ ዲብ ህሌኑ ዝያደት ለሰፈር ነፍሰ ለትፈትዩ ሰፈር ስያሐት ወተምሸየት መሰለ። ለምለዐል ለአድርፊ ሐሽለት ወክምሰል አግዳድ ምን ርሸመ ረወሪት ገጽ ተሐት አስክለ ጋድሞታት ለለአድረዋሬ አወድግ ወመሓዛት ምሰለ ግልቡቡ ለልትረኤ ዕጪይ ወእመን። ለዲብ ክል አካን ለልትረኤ ደገጊት ወግረህ። ክምሰልሁመ እት ፈርወንተር ብጋሰትነ እት ከበሰ ለዘልመት ዝላም እብ ውሓይዘ ለአስቱቱ ጋድሞታት ቀላቅል ምፍጋር ጸሓይ ዐድነ ዲብ ነዐፌ ህይ። ምነ ብሩድ አውሎታት ከበሰ አስክለ ሕፋን ጋድሞታት ለበዝሐ እቱ ቀላቅል ንሸልሀት ዲብ ህሌኑ ለአድብር ወለጋድሞታት ክሉ ኦሮትክ ናዩ ግርመት ወጀላል ከልቅ እትኩ። ለእስቡሕ ምን ብርድ አስመረ እት ገርብነ ላብሳሙ ለዐልነ ጅከክ ወፈላይን ህይ ዲብ ቀላቅል ክምሰል ትከፊነ እብ ዎርዎር እግል ነሓርጡ አስተብዴኑ።

ለምሰልነ ዐለው አንፋር ጀማሂር ሳሕል። መብዝሐም ምን ሰር ሰብዓታት ዓማርም ፍንጌ 15 ወ20 ዲብ እንቱቱ ጀላብ ሕርየት ወእስትቅላል። ጀላብ ወጠን ወሽዐብ ዲብ ልብሎ። ደረሳይ ወደረሳይት ምን መድረሰቱ ሐረሰታይ ወበዐል ንዋይመ ምን ገርሀቱ ወተዋቡ እብ ዎርዎር ዲብ ጀርጥ አስክለ ምድር ምሕርበት ላቱ ቅብለት ሳሕል ጀላብ

ንዳል ሕርየት እግል ሞት ወቀትል ዲብ ሰፋፍ ሰውረት ለትሓበረው እቱ ወክድ ንዳል ወስሙድ ትቅብ ልብል እትኩ።

እተ ወክድ ለህይ ለበዝሐው ሸባብ ኤረትርየ ምን አውለት ወቀላቅል ጀላብ ንዳል እት ንኡሽ ወናይ ሸበት ዕምሮም። ንዳል አው ሞት እንዴ ቤለው ምን ረዩም ወቅሩብ አስክ ሳሕል ተንክሮ እት ህለው። ክእነ ክም የም እግል ተምሸየት። ግንሓት ወሐውልየት እንዴ ኢጉብእ። እግል ሞት ወቀትል ወዲብ ደንገበ ህይ እለ የመቱ ንትመተዕ እተ ለህሌነ ሕርየት እግል ለአምጸኡቶም ሕፍን እንዴ ካዩደው ብርድት ለመጠውኑ። እሊ አዜ እብ ፈድል ሕርየት እት ረአስ መካይን ወዋያራት ሸነን ዲብ እምብል አደሐ ጸዐደ እንገይሱ ለዐልነ ምድር ምሕርበት ህይ። እተ ዘበን ለህይ። እብ እገር ምሰል ጽምእ ወሰፍረ ምን ገጽ አባዮም እግል ልትሐበዩ ላሊ እብ ከዋክብ ዲብ ልትመረሐ ህደም ምሰል አሸዋኩ ዲብ ካይዶ ምሰል አረቅብ ወራዊት እብ ግውሐ ወተልቡሰ ካዩዱ ዲብ ህለው ክእነ ክምሰል የም ልትካዩል እግልኩ።

ምን ረአስለ ግሩም መካሪቱ ታኪ አድብር ዲብለ በራር ጋድሞታት ክምሰል ትደሀርኑ። ዕንታትነ ድማን ወድገለብ ዲብ ለአቀምት። ዶል እግለ እብ ጀሀት ድገለብነ ልታሌነ ለዐለ ስልሰለት አድብር እት ነዐፌ ወዶልመ እብ ጀሀት ድማንነ አስክ ግንራራብ በሐር ለልትመደድ ርሐብ ጋድሞታት እት ንትፈረጅ ለሰፈር ዝያደት ነፍሰ ለረዬሕ ዐለ። ለምሰልነ ዲብ ዋያረት ለዐለው ገዳይም ምሕርበት ወእብ ፍንቱይ ማሌ ዲብ ሳሕል ሽዕቦም ለአፈዘዶ። ነዝሞ ወለዐንድቅ ለዐለው አንፋር መሕበር ጀማሂር ሳሕል ላቶም ቴለል ማሌ ወየም ዲብ ለአትዋይኖ ለአስተንትኖ። ልሰራበበእ ወልሰፋለሎ ዐለው። እስትንተን ናይለ ሐልፈ መሪር ንዳል ለለአትፋቅድ ሰርቤብ ወሰፈላል። እብሊቱ ህይ አፋሆም ምን ህግዩ ኣዝም ወዕንታቶም አስክለ ድማን ወድገለብ ለዐለ መካሪት ምድር እንዴ ወጀሀው ሕስ ባትካም ዶል ትርእዮም። እሊመ እት ሸዑር አትያም ክምሰል ህለው እበ ከርስ ደሚርም ለዐለ ሽዑር ተኣገርሱ።

አማንቱ። እሊ የም እብ መሸንገሉ እት ቀበትለ ሓምል ከራሲ ሄሊኮፕተር እንዴ ትወሸቅን ምን ሞባይላትነ ሰርነ ጥዑም ሐልየት እግል ንሰነጥ ሰማዓት ዲብ እዘንነ እንዴ ሳቀቅነ ነኣተንሴ ዲብ ህሌኑ ሰርናመ እግለ እብ መሸንገሉ ንትፊተት ለዐልነ ጋድሞታት። አወድግ። አድብር። ዐነክል ድብብ ዕጪይ ውበዕድ መካሪት ምድር እንሰውር ዲብ ህሌኑ ክሉ ሀምነ ዲብለ ኣማሙ ለዐልነ ምድር ምሕርበት ዐለ። ዲብ ሰር ሰብዓታት። ለእብሊ ጋድሞታት እሊ አስክለ ምድር ምሕርበት ልጀርበዩ ለዐለው ሸባብ ሐቱ ዶል እሊ በክት እሊ ምን ረክቦ እንዴ ትቤ ትተምኔ።

ልተላሌ..



አንፋር ጀማሂር ሳሕል እምሀሚሚ ክምሰል አተው




አድብር ድርፎ



ለፋዬሕ ጋድሞታት ቅብለት ሳሕል



መዳነት እምሀሚሚ



ብድራታት መካይን ወመቶር ሳይክል ገብአ

ሰወር - አብርሃም በየኔ
ኩባርም ጸሃይ

ወጠንያይ ብድራታት መካይን ወመቶር ሳይክል፡ ሰንበት ዐባይ 29 አክቶበር ለትፈናተ መራሕል እቡ ዲብ ቤት ገርጊስ አስመረ ገብአ።

እሊ ምን ሳዐት 8:30 አስቦሕ ለአንበተ ብድራ፡ ሐቲ ዱረት 1.4 ኪሎ ምትር እተ ለበ ጽርግያ ቱ ለገብአ። እት ክል መርሐለት ህዩ መትጃግረት ገዳይም ወሐዳይስ ሻረከው።

እሳልፍ ለትጃግረው፡ ናይ 1300 ሲሲ መትባድረት ሐዳይስ ቶም። ቶቶ ትምጋኸት ለጅንሰ መኪነት ሰውግ ለዐለ ፋንኤል እምሃ፡ እግል ኩሎም ሰነት ዱረት እንዴ ዐጽፈ ዲቦም ምን መርሐለቱ አወላይ ዲብ ፈግር፡ መሴ ታደሴ ወሃረባል ክፍላይ ህዩ ደርቡ አተው።

እምበልሁመ፡ እትሊ ጅግረ 1300 ሲሲ፡ 14 ደውረት ዱረት ለጤመው ገዳይም መትጃግረት ዐለው። እሊ ጅግረ 1400 ሲሲ ሐለት መቶር ለበ ጎልፍ ለጅንሰ መኪነት ዳብጥ ለዐለ ሚልክያስ ገዛኢ ቱ ለትዐወተ ዲቡ። ደርቡ ህዩ ዐወት መሓሪ ወዳዊት ማትዎስ አተው።

ናይ 1000 ሲሲ መትባድረት ገዳይም ህዩ፡ 12 ዱረት እተ ትጃግረው። 45 ሐለት ፈረስ ለበ 'ኡኖ' ለጅንሰ መኪነት ሰውግ ለዐለ አላይ ወልዴሚካኤል፡ ለጅግረ ምን ሰልፋ ዲብ ዋልዩ፡ እግል ገሌ ምነ መትባድረቱ ዱረት እንዴ ዐጽፈ ዲቦም፡ እብ ርሐብ ተዐወተ።

ክልኢቶም 'ፊያት 127' መካይን ሰውግ ለዐለው ዐወት ወልዱ ወሚርን ተወልዴመድህን ህዩ ሳለት ዐውቲ ለዓረገዮም ደረጃት ረክበው። እትሊ ሲሲ ጅግረ እሊ፡ ሐዳይስ መትጃግረትመ ዲብ 10 ዱረት ቡድራም ዐለው። 'ላንቻ A-112' መኪነት ሰውግ ለዐለ ፋሲል የማኔ ዲብ ልትዐወት፡ ናሆም አብረሃም ወናትናኤል መኮንን ደርቡ ተለው።

ገዳይም ወሐዳይስ መትጃግረት 1600 ሲሲ'መ፡ ምስል እት 16 ክ'ለት ትባደረው። ምን ሐዳይስ መትጃግረት፡ 90 ሐለት ፈረስ ለበ 'ኒሳን' ለጅንሰ መኪነት እት ሰውግ ለትባደረ ምሉጌታ ህይሌ፡ "ረአስ ኩሎም" ለአተበለዩ ዐውቲ ረክበ።

እትሊ ጅግረ ናይ 1300 ሲሲ መኪነት እበ ለትጃግረ አሚር እማም ደርቡ እት ለአቲ፡ ያፊት የሴፍ ሳልሳይ ደረጃት ትረተቡ። ምን ገዳይም መትጃግረት ህዩ፡ 'ፎርድ' መኪነት ሰውግ ለዐለ ሐበን



ገይትኦም እሰልፍ ወለት-ሳተ ለኬደ ዐለ። 'ማዘዳ' ለጅንሰ መኪነት እበ ለትባደረ ሳይሞን ተሰፋይ ደርቡ ካልኦይ አተ።

እት ናይ 1800 ሲሲ ወ2000 ሲሲ ጅግረ ምን እንረኡ፡ ለመትጃግረት ምስል ቱ እግል 16 ክ'ለት ለትባደረው። እብ 1800 ሲሲ፡ 'ጎልፍ-2' መኪነት ሰውግ ለዐለ ሄኖክ ገብራሂውት፡ እግል ክምስልህ መኪነት ሰውግ ለዐለ አሕመድ ሐሴን እንዴ በድረ አወላይ አተ። 1400 ሲሲ ለሐለተ መኪነት ዳብጥ ለዐለ ሄኖል ግርማይ ህዩ ሳልሳይ አተ።

ለትወቀለው መትባድረትለ ዱራት ላቶም 2000 ሲሲ መካይን ለአትገራጦ ለዐለው መትጃግረት

ዱረት እግል ልብለስ ለአርአዩ ግድሉ ወገዲም መትባድራይ ጊላይ፡ ለምን ናይ እብ ሲሲ ለትዘይድ መኪነት እግል ኢተዐርዩ፡ ለወደዩ ጸገም ዐውቲ ለልትሐመድ ቱ።

እምበል እሊ፡ ብድረ መቶር ሳይክል'መ፡ ክፋል ናይለ ጅግረ ዐለ። ሰማን ዱረት ለትዳለ እሎም መትባድረት፡ እት ክልኤ ክፍለት (Category) ኩፋላም ዐለው። እተ ናይ 175 ሲሲ፡ ምን መርከዝ ተእሂል ሸባብ ላዋ ለመጽኦ እምባዩ ሳሙኤል፡ ኤልያስ መብረህቱ እንዴ በድረ አተ። እት ናይ 125 ሲሲ ህዩ፡ ናሆም ይትባረክ ለጅግረ ክልኤ ክ'ለት ክም ተርፈሆሁ፡ ሞተሩ ሰበት አኩ፡ ሀብቶም ገብራመስቀል፡ እምበል



ገዳይም፡ ንጉሴ ሀብቶም ወሲራክ ምሉጌታ -እግል 1800 ሲሲ ሐለት መቶር ሰውግ ለዐለ ጊላይ ገብራኤምላኽ፡ ሐቲ ዱረት ቀደምም እግል ለአንብት አጀዘው እሉ ከአንበተው። እሊ ለትወቀለ ሕሰር ለትህየቦዩ ጅግረ፡ ሲራክ ምን ጽባብሐ ምን ከጡ ሰበት ፈግረ፡ ለጅግረ እት ፍንጌ ንጉሴ ወገላይ ሌጠ ተርፈ።

'ሰባሩ' ለጅንሰ መኪነት ለአትገምቤ ለዐለ ንጉሴ፡ ፈርግ እንዴ አጭበበ እግል ጊላይ ዕሩዩ ምንመ ዐለ፡ ለዱራት ሰበት ተመ ላኪን፡ ጊላይ ገብራኤምላኽ ተዐወተ። እብ ዓመት፡ ንጉሴ ለህይብት ዐለት

መትጃግራይ አወላይ ፈግረ።

**እሊ ሐቆ አርበዕ ሐል ለገብእ ጅግረ፡ እምበል ብቆት እብ ሰርገል ምን ተመ፡ ለዐቤት ዐውቲ ቱ። እግል ሰላመት መትባድረት አካን ሰኔት መትሐራዩ ህዩ ለትወቀለ ዶር ዐለ እለ።

** እት ገሌ መራሕል ለዐለ ሕዳን መትባድረት፡ ምስል ወቅት እንዴ በዝሐው እግል ልምጽኤ እግል መትጃግረት ለልአትናይት ተዩልል እግል ልትከለቅ፡ ምህም ጋር ቱ። እምበልሁመ፡ እምበል ውላድ፡ አዋልድመ እተ ጅግረ ምን ሻርኩ ለጅግረ ዝያደት ወገረመ ለልብል ረኡይ መትፈርጀት ህለ።

**መትባድረት፡ ኩሉ ከሳይሮም ናሶም እት ለአታምሞ ጅግራሆም ምን አትመመው፡ ሐምዴ ተአስትህሎም። እብ ዓመት፡ እሊ ብዝሓም መትፈርጀት ክም ቡ ለአርአ መጃል ርያደት፡ እት መስተቅበል ብዝሓም መትባድረት ምስል ሕበር አዋልድ እሶም እግል ልሸብብ ሰእየት መኣይደቱ ቱ።

ጅግረ ኮበሪት እግር ከረም ሸክል ተመ

ፓራዲዞ ሻምፕዮን ነስአ

ናይ ከረም ዮም ዓመት ጅግረ ኮበሪት እግር ሸክል (ግራሲ-ሩት) አቅሊም ምግብ፡ ሰንበት ንኢሽ 28 አክቶበር፡ ታርፋ ለዐለ ትልህያታት እንዴ ወደ፡ ናይ 2023 ጅግራታቱ አትመመ።

እትሊ 16 ምዴርየት ለሻረከዩ እቱ ደውራ፡ እተ ዕለት ካቲመ እት ካሲ ለተልሀው ምንተሐት 17 ሰነት ፍረቅ ውላድ፡ ፓራዲዞ ወዕዳገ ሐሙስ ቶም። ትልህዩ 0-0 ሰበት ፈግረት፡ እብ ሪንሌታት፡ ፈሪቅ ፓራዲዞ 5-4 ተዐወተ።

ደርቦም ናይ ምንተሐት 15 ሰነት ለዓማሮም ውላድ፡ ምግብ መዲነት ወፓራዲዞ ተልሀው። እት አወላይ ሾት 1-1 እት ፈግሮ ህዩ፡ ምብራቅ አወል ለትደርቡ ፈሪቅ ምግብ መዲነት አርበዕ ጎል እንዴ አተ፡ እግል ክልኦት ጎል ሌጠ ለወሰክ ፓራዲዞ 5-3 ቀልበ ኩትዐወተ።



እብሊ ህዩ፡ ምን ምንተሐት 13 ሰነት አዋልድ፡ ምዴርየት ገጀረት አወላይት እት ፈግረ፡ ካሲ ወመዳልያት ደሀብ ትሰርገዩ፡ ካልኦይት ምዴርየት ጎዳይፍ መዳልየት ወርቅ፡ ወሳልሳይት ምዴርየት አክርዩ መዳልየት አስራዲ ረክበዩ። እብ ውላድ ህዩ፡ ገጀረት፡ ማይ ተመናይ ወአባሻውል ምን አወላይ አስክ ሳልሳይ ትረተበው።

ምንተሐት 15 ሰነት፡ እብ አዋልድ አክርዩ፡ ዕዳገ-ሐሙስ ወበራኽ፡ እብ ውላድ ህዩ፡ ምግብ መዲነት፡ ፓራዲዞ ወማይ-ተመናይ ደርብ ሕድ ተዐወተው። ምን ምንተሐት 17 ሰነት ዓማር፡ ፓራዲዞ፡ እብ ውላድ ወአዋልድ አወላይት ፈግረት። አክርዩ ወቲራቮሎ እብ አዋልድ፡ ዕዳገ-ሐሙስ ወአክርዩ ህዩ እብ ውላድ ትነሰረው ከጀዋእም ነስአው።

እብሊ ህዩ፡ ፓራዲዞ ሻምፕዮን ናይ እሊ ጅግራታት ዮም ዓመት እንዴ ገብአ፡ ካሲ ነስአ። ዕዉት ፍረቅ ወአፍራድ ምን ለትፈናተው ሰብ ሰልጠት ጀዋእም ክም ትከበተው ህዩ፡ ዕላቃት ዓም ናይለ ጅግረ ሐበረ።

ፍገሪት ፕሪመር-ሊግ ዲብ 10ይት ሳምንቱ

1, ቶተንሃም እግል ክሪስታል-ፓላስ	= 2-1
2, ብራንትፎርድ እግል ቼልሲ	= 2-0
3, አርሰናል እግል ቪፊልድ	= 5-0
4, በርንማውዝ እግል በርንሊይ	= 2-1
5, ኤቨርተን እግል ዌስትሃም	= 1-0
6, አስቶንቪላ እግል ሉተን-ታውን	= 3-1
7, ሊቨርፑል እግል ኖትንግሃም	= 3-0
8, ማንሲቲ እግል ማንዩናይትድ	= 3-0
9, ዎልቭስ ወኒውካስል	= 2-2
10, ብራይተን ወፋልሃም	= 1-1



ሊቨርፑል ቅባል ኖትንግሃም (3-0) እተ ቀልበ ዲበ ኢነት



አቅሊም ግብለት በሐር ቀየሕ፡ እብ አርበዕ ምዴርያት፡ 31 እዳራት ደዋዩሕ ወ109 ዐዶታት ለትክወነ ምን ራስ ዱሚረ አስክ ዲዋሎ ለልትመደድ 23,755.26 ኪሎሚተር መረበዕ ፍይሒ ለቡ እት ገብእ፡ እብ ምፍጋር ጸሓይ ምስል በሐር ቀየሕ፡ እብ ቅብለት ምስ አቅሊም ቅብለት በሐር ቀየሕ፡ እብ ግብለት ወግብለት ምውዳቅ ጸሓይ ህዩ ምስ ጅቡቲ እብ ምውዳቅ ጸሓይት ወቅብለት ምውዳቅ ጸሓይ ህዩ ምስል አቶብዩ ልትሓደድ። 75% ምን ሸዐብ ግብለት በሐር ቀየሕ ዲብ ርዕዮ ነብር እት ህላ፡ ለተርፈ 25% ህዩ ጀለቦት ዓስ ወአፍረዮት ጩወት ወትጃረት ልትናበር።

ሓለት ጀው፡
ምን ወሬሕ ማዮ አስክ ወሬሕ አክቶበር ዲበ ህለ አወረሐት 43.c ለትበጽሕ ሐፋነት ለትትረኤ እቱ ዲብ ገብእ' ለተርፈ አውረሐት ድህርት ሓለት ሐፋነት ህላ። ምውዳቅ ጸሓይ ክፈል ናይለ አቅሊም ምን 500-2000 መትወቃል ለቡ አድብር ሰበት ቡ ናይ አውለት ሓለት ጀው በህለት ሸበህ ብሩድ ወዋሉል ቲ።
ሰዋሕል በሐር ወእርዛቱ፡
ዲብ ረአስ 400 ኪሎሚተር ፍይሒ ለቡ ግንራራብ በሐር ናይለ አቅሊም ክምስል ከረ ማርስ ፈዋመ ሸሪፍ፡ ሳንዓቡ፡ ሃይኩኩ፡ ጀዛይር ሚሃቡ፡ ካሩም ዓሌ ወኩድ፡ ዓሌሐድ፡ ወክርተ፡ ሓንዶ፡ ሐዱሊን፡ ማንዶለ ወብዕድ ዝያድ 30 ጀዛይር ብእቲ። ዲብ እሊ ጀዛይር አዋራፍ በሐር ቃሊ ዓሳታት ክምስል ከረ ሸሪምፕ፡ ሎሽሰተር ወክራፕሱ፡ ምን ዓስታት ዐባዩ ህዩ ክምስል ዓስ ሐት



አቡሰላሙ፡ ወአት በሐር ጋብሌ በሐር አቡሴፍ፡ ሻርክ ወለትፈናተ ግዝፍ ለቡ ዴራክ፡ ዐረቢ፡ ገሓሽ ኩሸር፡ ዐጋም፡ ሸዊ ወሳክለ ወብዕድ ዝያድ 1000 ለትፈናተ ጅንስ ዓስ ህላ።
እብ ተውሳክ፡ እግል መሻቀዩ፡ ዕዋር፡ ልባን፡ ሰደፍ፡ ግርመት ወብዕድ ለከድም ቃሊ አሻም ኮክዩ ሐርከ ወሐድረ ዝያደት መንፈዐት እቅትሳድ ወአሀምየት ድዋር ለቡ ክምስል ዕንባበ በሐር፡ ሰዐር በሐር፡ ዕጩይ በሐር ወሀረም በሐር ፈሊሚን፡ ጋልስ ሄሮን፡ ተረንስ ቡቢስ ከራብ ወፕቡርሽርስ ለልትበህል ግሩም

ጅንስ ሰራይር መልክ፡
ታሪካይ አካናት ወአሳር፡
እግል አምኣት ሰኖታት ናይ ዓዳት ወእግል አምኣት ስኒን ናይ ዓዳት ሐዳረቱ እንዴ ሐፍዘ ዲብለ እት ረሐይተ ለህለ ናይ 800 ሰነት ዕምር ለቡ ክምስል ከረ ዐራት፡ ዲንከራ፡ ሰይፍ፡ መዋሐን፡ ስምስም ወባንተ እብ ፔርሻውዩን ለተሐፈረ ዐወሊ ዲብ ረአስ እመን እብ ዐረቢ እንዴ ትወቀረ ለትኩተብ አሰር መቃብር ዲብ አዩመን ወዲብ ጀዘረት ማንዶለ ናይ አትራክ በሕርየት ለሐፍረወ ሰለስ ባስክት ማይ ለከሰስ ቲ።
ዲብ ሚዲሪ ወዕዲ ለህለው ናይ በዲር መሳግድ ዲብ መዲነት ዐሰብ ዲብ ሰነት 1886 ለትሸቄት ከኒሰት፡ ቅዋት ሸዕብዩ ተሕሪር ኤረትርዩ 1ይ ክፋል ለተአሰስ እተ ስዶሕዳለ እግል ተሕሪር መዲነት ዐሰብ ዲብ ገብእ ፊራሮ ደንካልዩ ምስል አባይ እግል መደት ክልኦት ወሬሕ ሐርብ ድቁብ ለገብእ እተ ጀብህት በይሉል ወእግል አድመኖት ሰያደት ወጠን ዲብ ገብእ ወራራት ፍርስነት ለትሸቀ እተ ጀበህት ቡሬ ወድፍዓት ዱሕቲም ወብዕድ ገሌ ሐድ ምነ ብዙሕ ዲብ ከርስ ናይ አቅሊም ግብለት በሐር ቀየሕ ለህለ ታሪካይ አካናት ወአሳር ቲ።
ርዝቅ መቢዐት፡
ዲብ እሊ አቅሊም እብ ኑዕየት ወብዝሒ የም አለቢ ሔዋናት ከደን ክምስል ከረ አድግ ከደን፡ ሰገን፡ ሸውክን፡ ዒዋር፡ መንተሌ ሐሽል፡ ከራይ ሃቡይ ወለትፈናተ ጅንስ ሰራይር ለህሌ እት ህላ፡ ክምስል ከረ ገምርት፡ ዐቅቤ

ቆግ፡ ተሰሰ፡ ማንግሩሽ ወዐርኮብ ዕጩይ ወፍገሪት በሐር ላቱ ክምስል ከረ ጩወት፡ ዓሳታት ክምስልሁመ ጋዝ፡ ፖታሽ፡ ሐጺን ማርጥ፡ ፎስፈረስ ወእስንምቲ ህላ።
ከደማት እጅትማዕየት፡
ሸዐብ አቅሊም ግብለት በሐር ቀየሕ ቀደም ሕርየት ከደማት እጅትማዕየት እብ ዓመት ወጀዶት ነዲፍ ማይ ሲቶ፡ ተዕሊም፡ ዓፍየት ህዩ እብ ፍንቱይ ምን ቅሩቡ ረክብ ይዐለ፡ ዲብ እሊ ወክድ እሊ ላኪን ሕክመት ኤረትርዩ ፈድለ ምነ ቀደም ሕርየት እንዴ አስተብደ ዐዳለት እጅትማዕየት እግል ትትመደድ ትወድዩ

ለዐለት ወቀይ ብዝሒ ናይለ ዲብለ ተሐደደ ደረጃት ተዕሊም ለዐለ 14 መአሰሳት ዲብ እሊ ወክድ እሊ ናይ ቀደም ተዕሊም፡ መአምብታት፡ ምግባይ ወካልኣይ ደረጃት ተዕሊም እንዴ ፈይሐ ዕልቡ ዲብ 76 ዘይድ ህላ፡ ዲብ ዐሰብ ጢዖ ወረሐይተ ሌጠ ሕዱድ ለዐለ ከደማት ዓፍየት ዲብ ክለን ምዴርያት እብ ኑዕየት ወብዝሒ ዲብ ልትመደድ ከዳማት ዓፍየት እግል ልደመን ወፈሀም ሸዐብ ዲብለ መጃል እግል ልዕቤ ክድመት ዛይደት ለልሀይበ 2 እሰብዳልያት መርጅዕየት 12 ዕያዳት እንዴ ትብን ክድመት ዓፍየት ለሀይብ ህላ።
መሐገዝ ማይ ሲቶ ለዐበ መታክል ዲብ አምዕላይ መናበረት ሸዐብ ሰበት ዐለ እግል አርህዮቱ እበ ገብእ ለትመቅረሐ ጸገም ወጀዶት አዳም ወንዋይ ለለአደምን መሻሬዕ ማይ ዲብ 31 እዳራት ደዋዩሕ ልዳሌ ዲብ ህላ፡ እብ ፊራሮ ዋርሳይ የከኣሎ ለትሸቀ 600 ኪሎሚተር ለገብእ ጽርግዩ ባጽዕ ዐሰብ እግል ደገጊት ለለአትራክብ አግቡይ ዲብ ደሐን መዋሰላት ዶር ዐቢ ለአገዴ ህላ።
ወራታት ሐርሱ፡
ዲብ አቅሊም ግብለት በሐር ቀየሕ ሐርስ እንዴ ትቤ መትሃጋይ እግል ሴምዓይ ለትዐጅብ ለዐለ ከሊማት ቲ። ሰበቡ ምስል ሰቦት አው ሰሕረ እንዴ ትበህለ ሌጠ ልትአመር ለዐለ አቅሊም እብ ሰበት ሐርስ እግል ትትሃጌ ሕልም መስል ምንመ ዐለ ዮም ላኪን ዲብ ጋድጥታት ገሕሮ መብረ፡ ራ፡ ስረሩ ወበይሉል እንዴ ትጀረበ ፍገሪት ሰኔት ክምስል ትረከበት ምኖም ስመዕ በሲር ቲ። ዐማር ጀራዲንመ ዲብ እሊ አቅሊም ዲብ



ብዙሕ ዐዶታት ምነ ልትከደም ክምስል ከረ ጠማዋም፡ በሰል፡ እቱ ለህለ መጃል ሐርስ እት ገብእ እሊመ ምን ወክድ ዲብ ወክድ ዲብ ዘይድ ገይስ ለህላ ቲ። እብ አሳስ እሊ ህዩ ዮም ዲብ አቅሊም ግብለት በሐር ቀየሕ ህላ።

10 ፍንቲት ስወር ሕዘው



Copyright © www.ActivityVillage.co.uk Keeping Kids Busy

ሳድስ ወራር እብ ካርቱን



ከገፋ ጃጣል ንግል ስነት መገገፋ ገወዳ ደቡ ወት ጅተ ንወገፋት ዮም'ማ ምን ገቢኝ ገሰጠዎይ።ኒፉ ዮም 15 ወርሕ 12 እብ፤ሀት ነዝን (ብርዝ) እንቋብገሳ ደፊዕት መያድ - ሊን እግል ጣፊምር ገቋንዳ ንግል፤፳፻ 21 እኛ ሰዕሰዕ ጉድብር ዐዳዖት እኩን ርሐንን። ሰዓት ምውር ሕገራሕ ምን። ዐለት እሱ፡ ምን እጃግ ዲብምሕ ሓላን፤ ወንዋዋ ለልትበህል ንካናት ስዓል ደሸና ንግል።